

عند مدام عفاف

أحمد، تامر.
عند مدام عفاف : أدب ساخر / تامر أحمد.
القاهرة : كيان للنشر والتوزيع، 2020.
160 صفحة، 20 سم.
تدمك : 3-071-820-977-978
1- أدب ساخر
أ- العنوان : 817
رقم الإيداع : 2019/25724
الطبعة الأولى : يناير 2020.
جميع حقوق الطبع والنشر محفوظة ©

كيان للنشر والتوزيع



إشراف عام:
محمد جميل صبري
نيقين التهامي

22 ش الشهيد الحي بجوار مترو ضواحي - الجيزة - الهرم
هاتف أرضي : 0235688678 - 0235611772
هاتف محمول : 01000405450-01001872290
بريد إلكتروني : kayanpub@gmail.com
info@kayanpublishing.com
الموقع الرسمي : www.kayanpublishing.com

© جميع الحقوق محفوظة، وأي اقتباس أو إعادة طبع أو نشر في أي صورة كانت ورقية أو إلكترونية أو بأية وسيلة سمعية أو بصرية دون إذن كتابي من الناشر، يعرض صاحبه للمساءلة القانونية.

تامر أحمد

يقدم

عند مدام عفاف

إهداء

إلى الكاتب العظيم الدكتور/ أحمد خالد توفيق، الذي
فقدنا برحيله نصف ذكرياتنا الجميلة ونصف متعة القراءة..
واحتفظ هو بمكان غالٍ في قلوبنا سيظل يحتله أبد الدهر.
لأنه.. جعل الشباب يقرأون.

شكر خاص لأخي وصديق عمري د. تامر إبراهيم لما كان له من دور مساعد كبير فيما يخص هذا الكتاب.. قد تجدونه يظهر متخفيا في أكثر من موضع في الكتاب.. فابحثوا عنه. أقدم شكري أيضا للدكتور/ محمد أحمد خالد على موافقته على إعادة نشر القصة الأخيرة في الكتاب «أسطورة الفتوة».

أما شكري الأخير فأقدمه لمدام عفاف وشركاها في مصالحننا الحكومية.. فلولاهم ما وجدت مادة هذا الكتاب. د. تامر أحمد

مقدمة

عزيزي المواطن.. يجب أن تعرف أن وجودك وهويتك وكيونتك لا قيمة لها إذا كنت لا تحمل بطاقة هويتك، التي سوف تثبت هويتك إذا قبض عليك لأي سبب -وبدون سبب أحيانا- فأنت لدى الحكومة مجرد ورقة.. سطر في دفتر.. رقم مدون على بطاقة بلاستيكية مغلفة.. لذا يجب عليك -وبشكل دوري- مراجعة سلامة موقفك الورقي الذي سيثبت وجودك وشخصيتك وكيونتك.. وإن لم تكن قد استخرجت إحدى هذه الأوراق فعليك بالإسراع في استخراجها في أقرب وقت.

عليك أن تعلم وتوقن بأن استخراج الأوراق الرسمية في بلدنا يؤدي في الغالب إلى استخراج روح المواطن إن لم يكن يمتلك صبر أيوب ومعجزات موسى وتسامح عيسى وثبات محمد، أو يمتلك واسطة بدلا من هذا كله، حيث إن الإجراءات التي يمر بها المواطن المصري في استخراج أية ورقة رسمية تعتبر -فعليا- من إجراءات التعذيب المحرم دوليا والتي لم يكن يجرؤ أبو لهب نفسه على استخدام أحدها.. فإذا اضطرتك الظروف للتعامل مع المرور أو السجل المدني أو الشهر العقاري أو الجمارك فأبشر.. لقد ضمنت مقعدا وثيرا من فئة الشيزلونج في جنة الخالدين.

في المرور تجد الكثيرين من «المشهلاتية» الذين يحترفون تسهيل مهام المواطنين من تجديد واستخراج الرخص والمخالفات مقابل رشوة صريحة «عيني عينك» تحدد قيمتها مسبقا قبل القيام بأي عمل، وتجد المرتشين متناثرين هنا وهناك وكأن هناك معهد عال -أو واطي بالأحرى- لتخريج دفعة مرتشين كل عام.. كما أن التواجد في نفس المجال وزيادة عدد المتنافسين أدى إلى تباريهم في السرعة وقلة السعر وجودة الخدمة.. وكله في مصلحة المستهلك -بفتح اللام- الذي هو المواطن.

المهم أنك تجد لافتة ضخمة في أحد مكاتب المرور مكتوبا عليها بالبنط العريض «الراشي والمرثشي في الناريوم القيامة»، والمثير في الأمر أن المرثشي ينظر لهذه اللافتة ولا يفهم ما بها أو كأن الكلام المكتوب بها لا يخص سيادته.. بل وأكثر من هذا.. تجده يقول للزبون «استناني تحت يافطة الرشوة الي هناك»، ويكثر دافعوا الإكراميات المجبرون لإنهاء أعمالهم بسرعة.. ويبدو أن الواقع يقول إن الي مش هايدفع رشوة هايفضل في المرور إلى يوم القيامة.

وفي الشهر العقاري الموضوع أكبر.. فالموظفون لا يريدون العمل والمكاتب ضيقة والطرق أضيق والأخلاق أضيق وأضيق وموظف الخزينة مثل سندريلا يختفي الساعة الثانية عشرة، وكأن الشهر العقاري هو مكان لقضاء عقوبة كونك مواطنا مصرية مع الشغل والنفاذ.

يقال إن المواطن المصري ضد الكسر.. وهذا صحيح لأنه مكسور بالفعل إلى درجة الفتفتة.. فلا يمكن كسره أكثر.

في هذا الكتاب عدة قصص حقيقية سمعتها من أطرافها
الفعليين.. وهي تجسد العذاب الأصلي للشعب المصري مع
الروتين والتحكم واللامبالاة.. وإذا كنت أحاول استخراج
البسمة من المواقف والحكايات الصعبة.. إلا أن هذا لا ينفي
أنها بسمة جاءت من قلب المعاناة.. وإن كان شر البلية ما
يضحك فهذا لا ينفي أنه شر البلية.
ولكن.. لعله يُضحك.

قابل للكسر*

«السيد المحترم: طاهر الإبراهيمي.. بعد التحية.. نحيطكم علماً أن لكم شحنة محجوزة في جمارك مطار القاهرة.. يرجى التوجه بكافة المستندات الخاصة بهذه الشحنة إلى إدارة الحجز الجمركي لاستلام شحنتكم».

فرغ طاهر من قراءة الخطاب الموجه إليه من الجمارك والذي يفيد بوصول التمثال الذي اشتراه مؤخراً من أمريكا وشحنه على عنوانه في القاهرة.. كان طاهر مولعاً بفن النحت وعاش أغلب حياته خارج مصر يتنقل بين مختلف البلدان، وكان يقضي في بيته العديد من التماثيل التي يعتبرها هو تحفاً فنية وقد أعد لها ركناً خاصاً في غرفة معيشته.. وكان بالفعل كل من يزوره يبدي إعجابه الشديد بمجموعة التماثيل المميزة التي يمتلكها وكان هذا يزيده سعادة.

توجه إلى إدارة الجمارك للمرة الأولى في حياته.. فقد كان قبل ذلك يعتمد على شركة وسيطة في شراء وشحن التماثيل ولكن لسوء الحظ فقد أنهت هذه الشركة أعمالها في مصر وكان طاهر مضطراً للتعامل بنفسه مع الجمارك لاستخلاص شحنته.. بدأ رحلته في أول مكتب قابله.. أطلع الموظف المختص على الخطاب ومستندات الشحنة فقال له:

- آآه.. أنت بتاع التمثال؟

- لأ حضرتك.. التمثال هو اللي بتاعي.

- أيا كان.. حضرتك موضوعك عند مدام عفاف.

- مين مدام عفاف؟

- يا راجل.. ماتعرفش مدام عفاف؟ دي المديره حضرتك..

- المديره شخصيا؟!

- شفت بقى.. مهممة بيبك جدا على فكرة.. ونصيحة (قال غامزا بعينه) فتح دماغك..

لم يفهم طاهر بالضبط ما الذي يعنيه الموظف، واستبعد تماما أن يكون قصده رشوة المديره.. فهي مديرة وفي موقع حساس وبالتأكيد تخضع للرقابة ولن تغامر بسمعتها.. توجه إلى مكتب المديره وأطلعها على الأوراق.

- آه، أهلا يا طاهر بك.. اتفضل ارتاح.. تشرب إيه؟

سر طاهر جدا من هذا الاستقبال واستبشر خيرا:

- لا مالوش لزوم.. أنا بس أول مرة آجي ومش عارف الإجراءات إيه.. فمش عايز أتأخر.

- لآ، أنا تحت أمرك.. كلها دقايق والموضوع يخلص.. ثم أضافت بلهجة ذات مغزى

- بس حضرتك تصبَح عليّا وكل شيء يتم على طول

قال طاهر بحرج:

-آه أنا آسف دخلت من غير ما أصبَح على حضرتك..

Good morning

- جود إيه يا عنيّا

Good morning يا فندم

- آآه.. جود مورننج.. اللي هي بتاعت الصبح دي..

ماشي.. طيب قل لي.. هو التمثال دا عبارة عن إيه؟

- دا تمثال سوبرمان، بس عامله نحات مشهور قوي في أمريكا.

- طيب والنحات دا مش عامل حاجة لصبايضر مان؟ أصل عندي ابني بيحبه جدا!

- صبايضر!! آه طبعاً عامل.. هو ناحت كل الشخصيات وعامل لها تماثيل بأحجام مختلفة.

قالت بنفس اللهجة ذات المغزى:

- طيب إيه؟

قال طاهر بعدم فهم:

- إيه؟

قالت باستنكار:

- إيه؟

- إيه إيه يا فندم؟ مش فاهم حضرتك.

- هممم.. مش فالاهم وجود مورنينج.. طيب تمام.

تبدلت لهجتها فجأة وقالت:

- طيب يا أستاذ حضرتك في بعض الإجراءات البسيطة مطلوبة قبل استلام التمثال.

- إجراءات إيه يا فندم؟

- التمثال دا لازم يتعرض على أمن المطار وإدارة المفرقات.

- مفرقات! ليه بس.. دا مجرد تمثال.

- وأنا ايش عرفني إن مفيش جواه أي داهية ولا مواد متفجرة ولا بمب.

- بمب؟! -

- آه يا أستاذ.. دي مسئولية ما قدرش أتحمّلها.. وبعدين ماتقلقش دا إجراء روتيني.. شهادة صغيرة من إدارة المفرقات إن التمثال مفيهوش قتابل ولا يشتعل ولا يساعد على الاشتعال ويستحسن يكون لا يعكر ماء الجير، وبعدها تستلم على طول.

- وفين إدارة المفرقات دي؟

دلته المديرية على المكان المنشود فذهب إليه طاهر وقابل أحد الضباط وقال له:

- من فضلك كنت عايز حد ييجي يكشف على التمثال بتاعي.

- سلامته ألف سلامة.. العيادة الصحية المبنى اللي ورانا.

- لأ حضرتك هو مش عيان.. هو محجوز في الجمارك وعايزين شهادة إنه خالي من المفرقات عشان أستلمه.

- أنت لازم جاي من عند مدام عفاف.

- بالضبط.. حضرتك عرفت منين؟

- وأكيد طلبت منك طلب وانت مانفذتهوش.

- الحقيقة لأ.. ما طلبتش، هي طلبت بس إني أصبح عليها.

- أهى طلبت أهى.. وعملت إيه بقى؟

- قلت لها Good morning

قال الضابط ساخرا

- قلت لها Good morning .. ومستغرب انها بعثتك هنا
- آه والله مستغرب ومش فاهم .. المهم حضرتك هاينفع
تديني الشهادة ولا إيه؟
- هانبعت لجنة تفحص التمثال .. عدي علينا كمان أسبوع.
- بعد أسبوع ذهب طاهر لمكتب المديره حاملًا شهادة خلو
التمثال من أي مفرقات أو مواد تصلح للفرقة .. دخل
المكتب ظانًا أن موضوعه سينتهي لكنه كان واهما .. قالت
عفاف بعد أن قرأت الشهادة:
- مبروك .. طلع مفهوش مفرقات.
- ما أنا قلت لحضرتك .. دا مجرد تمثال.
- تمام .. مجرد تمثال .. طيب هو أنا بس كنت باراجع قانون
التماثيل واكتشفت إن حضرتك مطلوب منك شهادة ثانية
صغيرة.
- قانون التماثيل !! وشهادة؟ شهادة إيه تاني؟!
- وإحنا بنفحص التمثال لقينا في كاميرا في عينه.
- كاميرا إيه؟! دي لمبات.
- والله الي يقول هي كاميرا ولا لمبة هو الأمن الوطني مش
أنا .
- الأمن الوطني مرة واحدة؟!
- أيوة يا أستاذ دي مسئولية وأنا ماقدرش أتحمّلها.
- قال طاهر بقله حيلة:

- طيب فين الأمن الوطني دا؟

بناء على توجيهات عفاف ذهب طاهر إلى مكتب الأمن الوطني في المطار وقابل أحد الضباط ليطلب منه فحص التمثال فقال الضابط بمنطقية:

- بص يا أستاذ.. أنا أفحص مواطن أشوف عليه أحكام ولا لأ.. أفحص واحد أشوفه له نشاط متطرف ولا لأ.. إنما أفحص تمثال أشوف الي فيه دي كاميرا ولا لمبة.. هو أنا كهربائي.. دا أنا نقيب وعلى وش مقدم.

- والله يا باشا لو عليا أنا أريقك لواء دلوقتي.. بس دا مش طلبتي أنا.

- هو أنت جاي من عند مدام عفاف؟

- دا واضح إنها معروفة قوي.

- دا إنت حظك مهيب.

- طب أعمل إيه؟ مش هاتدينني حاجتي غير بالشهادة بتاعت الأمن الوطني.

- إنت طيب قوي.. وحياتك ولا هاتديالك بعد الشهادة.. بص أنا بصراحة مش فاضي للكلام الفارغ دا وعندنا شغل أهم بكتير من تمثال سوبرمان بتاعك.. بس عشان إنت شكلك محترم ومش وش بهدلة أوعدك إننا في خلال أسبوع بالكثير هانكون فحصناه وجهزنا لك الشهادة.

- والله يا فندم يبقى كتر خيرك.

بعد أسبوع آخر تسلم طاهر شهادة خلو التمثال من الكاميرات الفوتوغرافية والرقمية وأن ما يوجد بعين التمثال

ليس كاميرا من أي نوع معروف.. دخل ملو حا بالشهادة
لمكتب عفاف التي تفحصت الشهادة بشك:

- غريبة مع إن شكلها كاميرا.

- يا ستي إنتي مش قلتي إنك مش انتي إلي بتحددي..
أهو الأمن الوطني بنفسه قال انها مش كاميرا.

خبطت بقبضتها على المكتب صائحة:

- آمال تطلع إيه إلي في عينه دي؟

- لمبة.. والله العظيم لمبة.

- طيب وهي اللمبة دي مش المفروض تنور.

- آه.. مهو جاي معاه بطاريات عشان تتوصل باللمبة
وتنورها.

قالت بتفهم:

- آآآآه.. معاه بطاريات.. طيب يا راجل مش تقول كده!

كُتبت ورقة ومهرتها بتوقيعها ثم قدمتها لطاهر قائلة:

- حضرتك تجيب لنا شهادة من الجيش إن دي مش بطاريات
صواريخ.

- جيش؟! بطاريات صواريخ.. إنتي أكيد بتهرجي!

- هاهرج معاك ليه.. أعرفك أنا؟ هاتصاحبني؟

- يا مدام أنا مش قصدي بطاريات.. قصدي حجارة..
حجارة عادية.

- بس أنت قلت بطاريات.

- أنا.. أبدا.. أنا قلت حجارة.

- غريبة مع إني متأكدة إني سمعتها بطاريات.
- والله العظيم حجارة.
- قالت مهدئة إياه بلهجة خبيثة:
- طيب يا أخي حجارة حجارة.. مش بطاريات.. ولا تزعل نفسك.
- سحبت منه الورقة الأولى وقدمت له ورقة أخرى:
- الموضوع كده بقى أسهل.. هاتجيب لنا بس شهادة صغيرة.
- قاطعها بفراغ صبر:
- منين تاني؟
- من سفارة فلسطين.
- قال باستغراب:
- وسفارة فلسطين مالها ومال التمثال بتاعي؟
- عايزين شهادة منهم إن الحجارة دي غير الحجارة المستخدمة في الانتفاضة.
- حجارة؟! انتفاضة؟! أنا سمعت صح؟!!
- مهو مش معقول ناخذ إحنا الحجارة كلها ونسيب فلسطين.. هايعملوا انتفاضة بإيه.. خللي عندك وطنية يا أخي.. ولا عشان يعني صوبرمان دا أمريكاني؟
- يا مدام عفاف انتفاضة الحجارة خلصت من زمان.
- ولو.. الانتفاضة هاتفضل مستمرة برغم العدوان.
- يا ستي دول حجرين قلم عشان اللمة.. لا ليهم دعوة

بانتفاضة ولا حرب ولا نيلة.. اعملي معروف شوفي لي أي حل
تاني.

- مممم.. حجرين.. طيب بص.. إنت صعبت عليا..
وعشان كده أنا هاسهلها عليك على الآخر.. ودا آخر
تساهل معاك.

كتبت ورقة أخرى ومدتها إليه:

- هاتجيب لنا شهادة من شركة الشرقية للدخان إن دول
مش حجرين معسل.. في تساهل أكثر من كده؟

خرج طاهر من مكتب عفاف وقد تذكر المشهد الشهير
في فيلم «عسل أسود» مع موظف السجل المدني المرتشي..
وشعر بنفس السواد الذي شعر به بطل الفيلم.. في الشركة
الشرقية للدخان كان الكل -بالطبع- يتعجب من ذلك
الطلب الغريب والذي يواجهونه لأول مرة، وبعد أن سألوه
السؤال المعتاد «أنت جاي من عند مدام عفاف؟» أخذوا
الموضوع كنكتة ومروا به على كل المكاتب كفكرة ترفيهية
مسلية لموظفي الشركة الذين رَقَّوا لحاله في نهاية الأمر
وأعطوه الشهادة المطلوبة.

في ساحة قرية البضائع وبعد أن اطلّعت عفاف على
خطاب الشركة، استدعت أحد العمال وقاموا بفتح صندوق
التمثال وقالت:

- تمام.. كده بقى نخط الحجارة ونشغل اللبنة ونتأكد.

قرّنت القول بالفعل وضغطت زر الإضاءة فأضاءت
اللمبات في عين التمثال باللون الأحمر وبدأ كتحفة فنية

فعلا.. قال طاهر في فرح:

- شفتي بقى يا مدام.. أهى لبه أهى زي ما قلت لك
واشتغلت بالحجارة.. مكنتش باضحك عليكى.
مالت عليه عفاف وقالت بنفس اللهجة إياها ذات المغزى
وبصوت خفيض:

- هو تمثال صبايضر مان عينيه بتنور كده برضه؟!

- أكيد طبعا يا مدام.

- طيب إيه بقى؟

- إيه يا فندم.

- عايزين نجيب صبايضر مان للواد ابني!

- طيب ماتجيووا.. تحبى أدليك الموقع الي بيتباع عليه
التمثال.

- الموقع؟!

- آمال إيه بس مش فاهم والله!

غيرت لهجتها وعلا صوتها مرة أخرى قائلة:

- لسه مش فاهم.. طيب تمام.. بص هو بس في مشكلة
صغيرة إن العين بتنور أحمر.

قال طاهر مازحا:

- وإيه المشكلة في كده.. ولا إنتي زمالكاوية وبتكرهى
الأحمر؟

- أولا آه أنا زمالكاوية.. ثانيا اللون الأحمر دا ممكن يطلع
ليزر.

- ليزر؟! لا طبعا باين إنه نور عادي مش ليزر.
- مش أنا اللي أحدد.
- بس فهمت.. عايزة شهادة من مين المرة دي.. مازنجر؟
- لا يا مرح.. معهد الليزر.
- هو بقى في معهد الليزر كمان.. ما شاء الله.
- طبعا يا أستاذ عندنا معاهد لكل حاجة.. يلا خف نفسك بقى عشان تلحق تحيب الشهادة وترجع تاني نكون فكرنا لك في شهادة ثانية تحبها.
- من عنيا.. دا أنا حبيت موضوع الشهادات دا جدا.
- ذهب طاهر بسيارته إلى معهد الليزر وقال لهم كلمة السر «أنا جاي من عند مدام عفاف» فتعاون معه الجميع وأنها له الشهادة على الفور فعاد لعفاف في نفس اليوم.
- إيه دا.. أنت لحقت تروح وتيجي؟
- سرعة الليزر بقى.. اتفضلي الشهادة أهي.. في أي شهادات تاني، ويمكن أستلم التمثال بتاعي بقى؟
- بص أنا هاكون صريحة معاك.. أنا أصلا شاكة إن دا يكون تمثال.
- أمال هايكون إيه.. بدلة غطس.
- قالت بمنطقية وهي تتفحص التمثال:
- لأ.. روبوت.. إنسان آلي.
- روبوت إيه بس يا مدام.. مهو تمثال قدامك أهو حجر مايتحركش.

- الكلام دا تضحك بيه على حد تاني.. أنا ياما عدى عليا
من الأشكال دي.. وفي الآخر كله بيعترف.

- أعترف بإيه؟

- إنه روبوت.

- والله تمثال.

صاحت فيه قائلة:

- مش مصدقك.. دا روبوت.. شكله باين جدا.. اتفضل
خليه يتحرك دلوقتي حالا.

قال طاهر بثورة:

- لأ ما هو أنا مش ربنا.. ما أقدرش أنفخ فيه الروح.. دا
تمثال.. تمثالــال.

- طيب خلاص ماتز عش.. أنا مش هاقدر أحدد إذا كان
تمثال ولا روبوت.. دي مسئولية كبيرة وأنا ماقدرش أتحمّلها..
ها تيجب لنا شهادة صغيرة من أكاديمية البحث العلمي إنه
مش روبوت وتبقى حليت الموضوع.

- دا أنت المفروض يسموكي مديرة العجز الجمركي مش
الحجز الجمركي.

- بتقول حاجة؟

في صباح اليوم التالي ذهب طاهر إلى أكاديمية البحث
العلمي متغلبا على دهشته من وجود هيئة بهذا الاسم
في مصر أصلا حيث يقبع البحث العلمي في قاع برميل
اهتمامات الدولة، ويحظى بميزانية أقل من مصاريف طفل في
مدرسة انترناشيونال.. تجاوز الباب ليجد عشرات الموظفين

الذين هم بدون وظيفة حقيقية رحبوا به بشدة وأجلسوه
وما أن علموا بقصته قالوا له:

- إزاي يعني مش عارفين يفرقوا بين التمثال والروبوت..
هي مدام عفاف مش هاتبطل تحكياتها دي بقى!

- هو أنتم كمان هنا عارفينها؟

- أمال إيه.. خد الشهادة أهى وربنا يكون في عونك
ويتتبعك إنت والتمثال بتاعك بالسلامة.

عاد طاهر مرة أخرى إلى إدارة الجمارك ودخل إلى مكتب
عفاف شاعرا أنه داخل على عشاوي.

- اتفضللي يا مدام عفاف.. شهادة إنه مش روبوت ولا
ييمشي ولا بيتحرك.

سألته بتحدي:

- ولا بيطير؟

- ولا بيطير.

- إزاي بقى.. هو مش صوبرمان.. يبقى بيطير.

- دا اللي في الأفلام.. إنها دا تمثال.. مش بيطير.

- مش إنت اللي تحدد إذا كان بيطير ولا لا...

قاطعها مكملًا الديباجة التي صار يحفظها جيدا:

- طبعاً.. ودي مسئولية وإنتي ماتقدريش تتحملها.. وعايضة

شهادة صغيرة من مصر للطيران إن التمثال مش بيطير!

- أو وزارة الطيران المدني.. أيهما أصعب آآآ.. قصدي اللي

يريحك فيهم.

- مش عايزة شهادات من الأمم المتحدة أو ستاد القاهرة..
أنا باعدي عليهم كل يوم؟

- لأ، مش للدرجة دي يعني إحنا مش عايزين نعقد الدنيا.

استغرقت شهادة وزارة الطيران أسبوعين استغلها طاهر في إنجاز بعض الأمور الأخرى حتى تم تحرير الشهادة فأخذها واتجه إلى مكتب عفاف -والذي أصبح بمثابة مقبرة أحلامه- حاملا ملفا ضخما من الأوراق فبادرته سائلة:

- إيه الورق دا كله؟

- لأ، دي فضلة خيرك شوية شهادات كده على ما قُسم..
شهادة من مصر للطيران إن التمثال دا تمثال ثابت لا يطير ولم يسبق له الطيران، وجواب من وزارة الطيران المدني إن في حالة إن التمثال يطير هم معندهم مش مانع وييرحبوا بطيران سوبرمان الشقيق.. وجواب من نادي الطيران يفيد إن التمثال ليس عضوا في النادي، وجواب من شارع الطيران بإن التمثال عمره ما عدى في الشارع بأي طريقة جوا أو برا أو بحرا.. ووزارة السياحة بتقول إنهم موافقين على طيران التمثال ترويجا للسياحة ودي شهادة تطعيمات التمثال ضد جميع الأمراض المعدية اللي ممكن ينقلها في حالة طيرانه رغم إنه مش بيطير، ورغم إن التماثيل مش بتطعم بس أنا طعمته.. وخطاب من هيئة الـ...

- بس بس إيه دا كله.. هو أنا طلبت منك كل دا؟ ليه يا حبيبي تعقدها على نفسك كده؟!

- معلش بقى أصلي معقد.. ممكن آخذ أم التمثال بتاعي؟

- هو إنت مهتم بالتمثال دا قوي كده ليه؟ اهتمامك دا مريب على فكرة.

- ليه إيه؟! بتاعي وبفلوسي وملكلي.. حقي إني أهتم بيه وابقى عايز أستلمه.

- لالا.. أنا كده ابتديت أشك.. ليه واحد زيك يصرف الفلوس دي كلها عشان يشتري تمثال.. دا أنا شفت سعره في الفاتورة اتخضيت.

- يا ستي تشكي في إيه.. أنا راجل بيعب النحت وباشتري تماثيل كتير.. بصي حضرتك.

أخرج لها تليفونه المحمول ليريها صورة على الجهاز.

- دي صورة الليفنج بتاعي.. كله تماثيل زي ما حضرتك شايقة.. اتطمنتي؟

- اتطمنت إيه.. دا أنا شكلي زاد.. بتعمل إيه بالتماثيل دي كلها.. الموضوع دا مش طبيعي.. باقولك إيه.. انت تجيب لنا شهادة من الأزهر إن التمثال دا مش أصنام.

- أصنام؟! هو في حد بيعبد سوبرمان.. أنا اسمي الإبراهيمي مش أبرهة.

- على الأزهر يا أستاذ ماتعطنيش.. وابقى سلم لي على صبايضرمان.

غادر طاهر مكتبها والقهر يملؤه.. فهو عاجز عن تسلم شيء يملكه لمجرد تعنت تلك الوظيفة التي ليس عليها رقيب يمنعها من هذا الاستبداد.. في طريقه لسيارته تذكر أن خاله له صديق يعمل في جهة أمنية ذات سيادة ومهابة.. فاتصل به

وحكى له عما حدث.. ثار خاله بشدة وعنفه أنه لم يتصل به من البداية وأمره أن يعود إلى مكتب عفاف مرة أخرى ويتنظر منه مكاملة.. عاد طاهر إلى مكتب عفاف ووقف أمام الباب فسأله بتهكم:

- مستني إيه؟

- مستني ال...-

قاطعتهما رنة الهاتف المحمول الخاص بطاهر نظر ليجد علامة Private Number تزين الشاشة.. فدفع التليفون إلى عفاف قائلاً:

- التليفون دا علشانك.

تناولت منه عفاف التليفون وأجابت بتردد:

- ألو.. أيوة مين الي بيتكلم؟

امتقع وجهها واستحال إلى اللون الأبيض من فرط شحوبه:

- أيوة يا فندم.. ليه بس يا فندم.. دا أنا خدامتك وخدمة التمثال.. يخرج حالا يا باشا.. اعتبره خرج.. وماله يا فندم ما يطير هو صغير.. أنا أسفة.. ليه بس كده.. طيب والدتي مالها بالموضوع.. الله يسامحك.. حاضر.. حاضر.. خدمة سيادتك وقرايب سيادتك وتماثيل قرايب سيادتك.. مع السلامة يا فندم.

أعادت التليفون إلى طاهر وجرت خارج مكتبها إلى ساحة الحجز الجمركي حيث أمرت العمال بإخراج التمثال وتحميله في كرتونته مرة أخرى وإعداده لمغادرة الجمرك فوراً، وأخذت

توقع على كل الأوراق على عجل وأرسلت أحد موظفيها
ببطاقة الائتمان الخاصة بها لدفع المصاريف الجمركية:

- طيب وشهادة الأزهر إنه مش صنم؟

- صنم إيه بس يا باشا هو إحنا في الجاهلية؟

- طيب مش عايزة شهادة من الصرف الصحي إن الصرف
على شراء التماثيل لا يضر بالصحة.

- حضرتك بتهزري يا باشا.. إنت لسه زعلان مني يا باشا..
دا إنت زي ابني يا باشا.

- ابنك.. اللي بيحب سبايدرمان؟

- الله يحرق سبايدرمان على اليوم الأسود اللي عرفناه فيه..
أنا آسفة.. سامحني.. امسحها في دقني.

- هي إيه؟

- جزمة سعادة الباشا قريبك يا سعادة الباشا.. أرجوك
تقول له ما يئذنيش.

- خلصيني فين التمثال؟

- حالا.. حالا يا باشا (وصاحت بصوت عال): يلا
التمثال يجهمز ويتسلم لسعادة الباشا بسرعة.

ارتبك العمال من استعجال المدير فأسقطوا التمثال أرضا
وكسرت قطعة من ذراعه.. بدا الخوف والذعر الشديد على
عفاف وهي تعتذر لطاهر:

- أنا آسفة.. وحياتك ما كنا نقصد.. أنا ممكن أعالجه
لسيادتك عند الدكتور بتاعي.. أسفـره بره.. أجيب له ممرضة
من «السعودي الألماني» تفضل جنبه لحد الكسر ما يلتئم..

- أرجوك ما تتذنينيش دا أنا غلبانة.
- قال طاهر بتشفت مستخدما نفس أسلوبها:
- دا كسر.. يعني علاج أكثر من ٢١ يوم.. يعني جنحة وأوديككم في داهية.
- أنا آسفة.. مكنّاش نعرف إنه قابل للكسر.
- مع إنها باينة ومكتوبة على الكرتونة.
- مخدناش بالنا والله.
- خرجولي التمثال دا للعربية دلوقتي.. عايز أمشي من هنا.
- تعاون العمال على حمل التمثال في كرتونه الكبيرة وأودعوه في سيارة طاهر الذي قاد سيارته مبتعدا عن ذلك الجحيم، بعد أن اكتشف أن ليست التماثيل فقط هي القابلة للكسر في هذا البلد.

كعب داير*

- شكر خاص للدكتور/ أحمد عبد الفتاح الذي كان له دور البطولة الرئيسي في هذه القصة.

*قصة حقيقية أيضًا.

أخيراً وبعد طول بحث وانتظار استطاع الأستاذ «بلال» أن يجد وظيفة ملائمة له.. ذهب ليقدم أوراقه للالتحاق بالعمل فطلب منه موظف الموارد البشرية استخراج قيد عائلي من السجل المدني كأحد مسوغات التعيين.. لم يكذب «بلال» خبراً واتجه إلى السجل المدني فقط ليفاجأ أن هذه الورقة يتم استخراجها -بدون واسطة- في عشرة أيام كاملة وبالواسطة عشر دقائق كاملة أيضاً، ولما كان «بلال» لا يملك من الواسطة شيئاً فقد اتبع الطريق التقليدي وقام بالتقديم على القيد ثم انصرف من السجل المدني مسلماً أمره الله، وما أن مرت الأيام العشرة حتى ذهب إلى السجل المدني لاستلام القيد العائلي ليفاجأ بامتناع الموظف عن تسليمه إياه:

- ليه حضرتك.. إيه المشكلة؟

- المشكلة إنك ماقدمتش شهادة ميلاد أخوك وبالتالي بيانات القيد ناقصة.

- أخويا! أخويا مين يا جدع أنت.. أنا ماليش إخوات.

- لأ، لك أخ اسمه «جلال».

- «جلال» مين يا عم بلاش هزار.. أنا ماليش إخوات.

- الكمبيوتر هنا مطلع لك أخ اسمه «جلال» بنفس بيانات الأب والأم.

- طيب يعني أجييلك أبويا وأمي يحلفوا لك إنهم مخلفوش غيري.

- يعني تفتكر هاصدق الحلفان ولا الكمبيوتر؟

- طب والحل إيه؟
- تطلع على الأحوال المدنية في العباسية وهم يحلّوا لك الموضوع دا.. إنما عندي.. فيه «جلال».
- انصرف «بلال» وهو لا يدري كيف يحل هذه المشكلة التي لم تكن تخطر له على بال، في الليل ذهب إلى المقهى كي يلتقي أصدقاء كعاداته ولكنه بدا شاردًا على غير عادته فسأله «عادل»:
- مالك يا «بلال»؟
- لا ماتشغلش بالك.. موضوع كده شاغلني.
- لا بجدد.. مالك مسهم كده وسرحان؟
- مفيش يا عم.. رحت النهاردة أستلم القيد العائلي بتاعي عشان أقدم في الشغل الجديد.
- طب وبعدين؟
- طلع لي أخ جديد.
- ألف مبروك يا معلم وهاتسميه إيه؟
- باقولك أخ مش ابن.. وبعدين هما مسمينه جاهز.
- اسمه إيه بقى؟
- «جلال».
- «جلال»! ماتسميه اسم جديد روش كده.. أدهم.. أكرم.. مالك.
- يا عم بقولك هو متسمي جاهز.
- ودا اتولد امتي دا.

- دا حضرتك مولود من ٣٥ سنة.
- طب ومعزمتناش على السبوع ليه يا ندل؟
- تصدق لو مبطلتش هزار يا «عادل» هاولع فيك.
- طب بجد إزاي اتولد من ٣٥ سنة.. دا كده يبقى قدك بالضبط.. توأمك يعني.
- بالضبط.. متسجل كأنه أخ توأم ليا.. الجاهل الي سجل الاسم في الدفتر كان خطه زي الزفت كتب «بلال» كأنها «جلال».. والحمار الي ينقل من الدفتر للكمبيوتر احتار يكتبها «بلال» ولا «جلال» راح كاتب الاتنين.. ونزلت كده على الكمبيوتر.
- كده بقى يا معلم أنت في حرامية في تايلاند بتاع كريم عبدالعزيز الي اكتشف فجأة إن ماجد الكدواني يبقى أخوه.
- مش باقول لك بتهزر.
- يعني هو الي إنت بتقوله دا حد يصدقه؟
- والله هو دا الي حصل.
- طب وهتعمل إيه؟
- هاروح بكرة السجل المدني في العباسية أشوف حل للموضوع دا.
- في اليوم التالي اتجه «بلال» إلى مصلحة الأحوال المدنية بالعباسية واتجه إلى مكتب التصحيح ليجد طابورا طويلا من المواطنين الذين لديهم أخطاء في الأوراق الرسمية.. وقف في الطابور منتظرا دوره حتى وصل إلى الشباك.
- صباح الخير.

- هاييجي منين الخير.. نعم!
- من فضلك أنا عندي غلط في القيد العائلي.. فيه أخ متسجل وأنا ماليش إخوات.
- دا مش عندي.. اطلع الشئون القانونية فوق في التالت.
- صعد «بلال» الدرج لأن المصعد معطل بالنسبة للمواطنين ويعمل فقط لكبار الضباط العاملين.. وصل إلى مكتب الشئون القانونية واتجه لإحدى الموظفات المنهمكة بشدة في وضع الدقة والتقلية على كيس الكشري الذي ستفطر به.
- صباح الخير.
- قالت دون أن تنظر له:
- عند مدام عفاف.
- هو إيه دا اللي عند مدام عفاف؟
- اللي إنت عايزه.
- هو إنتي عارفة أنا عايز إيه؟!
- عند مدام عفاف.
- اسمعي الأول أنا عايز إيه وبعدين قولي.
- ما أنا هاسمعك وهعرف وهاطلع اللي أنت عايزه عند مدام عفاف.. أنا باوفر وقتك ووقتي.
- معلش هاعطل حضرتك عن الكشري ثواني بس.
- قول يا سيدي.. وأدي الكشري.
- أنا كنت عايز أطلع قيد عائلي.
- القيد العائلي عند مدام عفاف.

- رحت القسم قدمت عليه وقال لي القيد هايتأخر ١٠ أيام.
- الطلبات المستعجلة عند مدام عفاف.
- وأنا باستلم القيد لقيت عندي أخ متضاف غلط في القيد العائلي وعازر أصلح الغلطة دي.
- التصحيح عند مدام عفاف.. زي ما قلت لك في الأول.
- طب هي فين مدام عفاف.
- ماجتش النهاردة.. اتفضل بقي متعطلناش.
- أنا عازر المدير.. هو فين؟
- عند مدام عفاف.
- أفندم!!
- مكتبه في آخر الممر قدام مكتب مدام عفاف.. اسمه الأستاذ متولي.
- اتجه «بلال» إلى مكتب المدير وهو في قمة الثورة والغضب طرق الباب مرة واثنين وثلاثا دون أن يسمع السماح بالدخول ففتح الباب ودلف إلى المكتب ليجد موظفا ضخيم الكرش والأنف والصوت يأكل شطيرة ضخمة من الفول ويقرأ الجريدة لم يرفع عينه عند دخول «بلال» إلى المكتب ولم يوله اهتماما أكبر مما كان سيوليه لو أن ناموسة دخلت إلى المكتب فبادره «بلال»:
- صباح الخير.
-
- صباح الخير يا فندم.

-
 - رفع «بلال» صوته قليلا:
 - صباح الخير يا فندم.
 - نعم؟
 - أنا عندي مشكلة ومحدث عارف يحلها.
 - الموظفين بره.
 - ما هم الموظفين معندهمش حل عشان كده جيت لحضرتك .
 - وأنا مالي ومال مشاكلك.
 - دهش «بلال» حيث كان يظن أن من ضمن مهام المدير حل المشكلات التي يعجز الموظفون عن حلها.
 - مش حضرتك المدير هنا.
 - أديك قلتها.. المدير.. ودا شغل موظفين.. مالي أنا ومالك بقى؟
 - معلىش يا فندم استحملني شوية هاعطلك ٣ دقائق بس.
 - ها.. خير.. في إيه؟! بس انجز ومن غير كتر كلام.. ويستحسن من غير كلام خالص.
 - من غير كلام إزاي يعني.. أشاور يعني زي اللي بيلعبوا أفلام؟
 - أنت هاتهزر يا مواطن.. من غير كلام يعني لو عندك ورق قدمه ومتكلمش كتير وأنا هاعرف المشكلة.
 - قدم له «بلال» الأوراق الرسمية التي تمثل مشكلته.. قلب

فيها بأصابع ملوثة بالفول والزيت والصلصة، وقضم قضمه
أخرى من الشطيرة قبل أن يسأل بفم مليء بالطعام:

- مالك بقي إيه مشكلتك؟

- أتكلم؟

- أمال يعني أنا هاقرأ أفكارك.. ماتنطق يا أستاذ
ماتنرفزنش على الصبح.

- حضرتك القيد العائلي دا في أخ ليا اسمه «جلال».

- آه.

- أنا بقي ماليش اخوات أصلا.

- بس الورق يقول إن لك أخ؟

- ما هي دي المشكلة.. وأنا عشان كده جاي لكم.

ضغط متولي على جرس على مكتبه فدخل الساعي
مهرولا، أشار متولي بغطرسه إلى جهاز الكمبيوتر الموضوع
على مكتبه:

- يا جابر.. تعالي دوس على الزرار دا وافتح الكمبيوتر.

فهم «بلال» حينها أنه ليس من ضمن مهام المدير الضغط
على الأزرار.. ضغط جابر على زر فتح الكمبيوتر وخرج من
المكتب بينما أخذ متولي يلعب على أزرار الحاسب وقال:

- أهو يا أستاذ.. أخوك «جلال» بنفس اسم الأب واسم
الأم وتاريخ الميلاد.. يبقى توأمك.

- ما هو أنا باقول لحضرتك إن ماليش إخوات أصلا.

- يا أستاذ افتكر كويس.. كلنا بننسى.

- فيه حد ينسى أخوه!
- دا في حد ينسى اسمه يا أستاذ.. وبعدين أهو متسجل على الكمبيوتر.
- أيوة ما هي دي المشكلة.. إنه متسجل على الكمبيوتر.
- الكمبيوتر بقى مستحيل يكون فيه غلط.. لأنه مش بني آدم هايقرأ غلط أو ينقل غلط.
- وهو مين اللي حط البيانات على الكمبيوتر؟
- موظف السجل المدني.
- والموظف دا مش بني آدم؟
- آمال روبوت كونترول.. بني آدم طبعا.
- يبقى ممكن يغلط.. وهو دا اللي حصل معايا.
- البيانات دلوقتي على الكمبيوتر.. تبقى صح ومافيهاش غلط.
- آمال أنتم ليه عاملين مكتب للتصحيح.
- عشان لو حد عنده غلط في بياناته نصلحها له.
- يعني ممكن يكون في غلط أهو.
- باقول لك إيه إنت وجعت دماغى.. أنت عارف مين اللي هايحل لك مشكلتك؟
- مين؟
- مدام عفاف.
- !!

قرن متولي قوله بضغطة على الجرس ليدخل جابر مسرعا:

- وصل الأستاذ عند مدام عفاف.

- مدام عفاف مجتش النهاردة.

- خلاص تعالي لها بكرة.. بس من بدري.

في صباح اليوم التالي توجه «بلال» إلى السجل المدني واتجه مباشرة إلى الدور الثالث وجال بنظره ليجد موظفة في حجم ووزن الثلاجة الكريازي تقضم بيضة مسلوقة وترشف الشاي توقع أنها عفاف التي يحكي عنها الجميع فتوجه إليها قائلاً التحية المحرمة التي لا يرد عليها أحد في هذا المكان:

- صباح الخير.. مدام عفاف؟

- أيوة أنا.. خير؟

- أنا من إمبراح بأسأل على حضرتك.

- أديني جيت.. استنى بس أخلص الفطار وافضى لك.

بعد نحو نصف الساعة من الإفطار والرغي والشرب نادته عفاف:

- ها خير.. إيه المشكلة؟

- والله المشكلة عويصة جدا وكل الناس قالوا لي محدش هاجلها إلا مدام عفاف.

انتفخت عفاف فخرا وغرورا مما أضاف لانتفاخها الطبيعي بفعل الشحم والدهون:

- قول يا سيدي.

حكى لها «بلال» قصته وأطلعها على الأوراق التي تثبت موقفه فقرأتها وبدا عليها عدم الاقتناع واستغرقت في تفكير

عميق ثم قالت:

- لما تحب تحرم أخوك من حقه متعلمش كده أبدا.. حرام عليك.. الدم عمره ما يبقى ميّة.

- يا ستي أخ مين أنا ماليش إخوان.

- الورق والدفتر والكمبيوتر يقول إن لك أخ.. أسيب أنا كل دول وأصدقك إنت.

- طيب ما هو على الكمبيوتر مكتوب إنه مطلعش بطاقة رقم قومي لحد دلوقتي.. يبقى عايش في البلد إزاي ٣٥ سنة؟

- عادي.. ولد صايع وبايظ ماشي من غير بطاقة.

- ومالوش أي سجل في أي مدرسة أو معهد أو كلية!

- بتحصل.. الواد ماتعلمش.. متسرب من التعليم.

- ومالوش أي سجلات في الجيش!

- خاين وعميل وهربان من التجنيد.

- طيب ماشي.. عندي دليل تاني.. شوفي حضرتك كده أنا متسجل في الدفتر بتاريخ كام؟

- ٢٠ أكتوبر.

- والزفت جلال دا متسجل بتاريخ كام؟

- ٢٧ أكتوبر.

- إزاي بقا..... فيه في الدنيا اتنين توأم فرق بينهم أسبوع.. أفهمها دي؟

- عادي.. هو اتولد معاك يوم ٢٠ واتسجل يوم ٢٧.

- ماشي.. إزاي بقى نتسجل في الدفتر برقمين مسلسلين ورا

بعض زي ما هو مكتوب أنا رقم ٣٦ وهو رقم ٣٧.. معقولة
يعني من يوم ٢٠ لحد ٢٧ محدش تاني اتولد ولا اتسجل؟

- عادي.. الستات حصل لها احتباس.. السجل المدني كان
قافل.. القلم كان ضايع في المكتب.. فيه ألف احتمال واحتمال.
- ومفيش من ضمن الألف دول إنه يكون غلط موظف في
التسجيل؟

- موظفين الحكومة مايغلطوش يا أستاذ.. اتفضل بقى
متعطلينش.

- يعني مفيش حل؟

- لأ طبعا فيه.

- الحقيني بيه أنا في عرضك.. ولا بلاش عرضك دا أحسن
أتوه.

- الحل الوحيد إنك ترفع قضية.

- قضية؟!!

- طبعا.. أنت عايز تلغي واحد من الوجود.. لازم حكم
محكمة.

صرخ بثورة:

- واحد مين.. طب هو فين الواحد دا.. حد يجيبه.. دا
واحد مش موجود في الوجود أصلا.

- بس موجود على الكمبيوتر.. اتفضل بقى على المحكمة
وماتضيعش وقتك.

- يا ست حرام عليكى أنا مقدم على وظيفة.. عقبال ما

الحكم يطلع أكون طلعت معاش.

- مش شغلي يا أستاذ.. اتفضل ماتعطلنیش.

تركته واستدارت -بمجهود شديد كفرقطة حربية تتحرك في شارع شبرا- لتناول أحد الكتب من دولاب في منتصف الغرفة ولفت نظره التضخم الشديد الذي تعاني منه في مختلف أجزاء جسمها حتى أنه للمرة الأولى في حياته يرى سيدة ذات «ليّة».. حملق فيها لفترة ليست بالقليلة حتى انتبهت أنه لم ينصرف بعد فاستدارت مرة أخرى له متسائلة بعصبية:

- في أي حاجة تاني؟!

- لا أبدا.. متشكر جدا.

- بالسلامة.

انصرف «بلال» من الأحوال المدنية وهو يضرب أخماسا في أسداس، فقد اتضح له تماما أنه سوف يعيش لفترة ليست بالقصيرة في هذه المشكلة.. تذكر أحد أصدقائه منذ أيام الدراسة والذي احترف المحاماة منذ التخرج في كلية الحقوق فاتصل به فورا:

- ألو.

- أيوة يا «هاني» صباح الخير.

- صباح النور.

حمد «بلال» ربه أن ما زال هناك بعض الناس يردون تحية الصباح.. ليس من بينهم موظفو الحكومة أو ضباط الشرطة.

- كنت عايزك في مشكلة قانونية.

- إيه الحوار.. رسيني.

حكى له «بلال» الموضوع فأجابه «هاني»:

- الحوار دا محتاج وقت طويل يا باشا.. عموما اعمل لي
توكيل وهات صور شهادات ميلادك إنت ووالدك ووالدتك
ووثيقة جوازهم ومؤهلك الدراسي ووصل نور وعقد إيجار
الشقة وصور شهادات التطعيم من الصحة وأصل وصورة
موقفك من التجنيد وفيش وتشبيه وشهادة مختومة من اتنين
موظفين ودمغة بجنيه وعديهم عليا ف المكتب بالليل.

- طلباتك صعبة.. أجيب منين دمغة بجنيه!

- هاها.. بتهزر.. مش مهم هابقى أشتريها أنا.

- طيب الحوار دا ياخذ وقت قد إيه؟

- يعني لو القاضي اقتنع بكلامنا والحق معاك وكل الورق
مضبوط هانخلص في ست سبع سنين إن شاء الله.

- يا حلاوة.

- يالا عشان أنا في جلسة وواقف قدام القاضي وهو
مستنيني أخلص المكاملة.. أشوفك بالليل.. سلام.. عفوا
سيدي القاضي.

أنهى «هاني» الاتصال تاركا «بلال» في حيرته.. ست سبع
سنوات.. ما هذا العذاب.

في الليل ذهب «بلال» كالعادة لملاقة أصدقائه على
المقهى.. فبادره صديقه «عادل» متسائلا:

- مالك يا بني مكشر كده ليه؟

- سييني في حالي يا «عادل» أنا مش ناقصك.

- إيه بس في إيه؟

- قالوا لي لازم أرفع قضية عشان أحل الموضوع.. والقضية دي هاتأخذ سبع سنين عشان تتحل.

- أوبا.. كده دخلنا في فيلم أريد حلا يا معلم.. عارفه؟ فاتن حمامة سيدة الشاشة العربية.. يا بختك يا عم.

- يا بختي إيه هو أنا قلت لك إني هأمثل معاها.. بطل هزار بقى وحياة أبوك.

- طيب حاضر.. هاتعمل ايه دلوقتي؟

- مش عارف بقى.

- طب ما تروح تاني للأحوال المدنية.. شوف أي ساعي أو موظف صغير.. ممكن يلاقي لك حل.. خش على بتاع الشاي وهو هايحل لك الموضوع.

- بتاع الشاي.. أنت شكلك اتجننت.. يعني المدير ومدام عفاف ماحلوش المشكلة وبتاع الشاي هو اللي هايحل!

- مين مدام عفاف دي؟

- قصدك مين مدام عفاف دول.

- مش مهم.. يابني افهم.. بتاع الشاي والساعي وعساكر المراسلة في أي مصلحة حكومية هم اللي في أيديهم كل المفاتيح يا معلم.. اسمع كلامي بس.. خش على بتاع الشاي واشرب واحد شاي وادفع له عشرة جنيه ومتأخذش الباقي.. ودردش معاها.. هو هايملك.

- بس أنا ما بشربش شاي.

- خلاص اشرب بنجر.

- ولو معندوش؟

- اشرب من البحر.
- غالبا دا الي هايحصل.
- يابني طاوعني.
- معنديش حل تاني.. أجرب.
- في الصباح الباكر اتجه «بلال» إلى مصلحة الأحوال المدنية للمرة الثالثة، حيث أصبحت زيارة مقام سيدي السجل المدني عادة صباحية لديه واتجه مباشرة إلى البوفيه فوجده مغلقا.. أسقط في يده فالخطة كانت مبنية بالكامل على لحلة عامل البوفيه.. وقف «بلال» حائرا لا يدري ماذا يفعل فلم يجد بدا من الذهاب مرة أخرى إلى مدام عفاف فوجدها كعادتها تمارس رياضة عَض البيض المسلوق.. كانت تعض البيضة بشراسة غريبة وكأنها تعاقبها:
- صباح الخير يا مدام عفاف.
- أهلا أهلا.. هو إنت.
- لأ، مش أنا.
- خير عايز إيه؟ مش قلت لك روح المحكمة.
- حضرتك المحكمة هاتأخذ سبع سنين.. يرضيكي؟
- هاعمل لك إيه يعني؟ بكرة يطلعوا قانون العدالة الناجزة ويخلصوك بسرعة.
- يعني مفيش أي حل تاني؟ شوفي لي حل الله يرضي عليكي.
- فكرت قليلا ورشفت رشفتين من كوب الشاي وفركت يديها ثم أخرجت من درج مكتبها نصف رغيف بلدي محشوا بالجبن الأبيض وقالت:

- ناول دا لمدام مها وقل لها مدام عفاف بتصبح عليكى
وبتقول لك هاتى كتاب قانون الأحوال المدنية.

تناول «بلال» الساندوتش من مدام عفاف بمتتهى الحرص
وذهب به إلى مدام مها التي ويا للعجب لم تكن منهمكة في
أكل أي شيء.. يبدو أنها دخيلة على مصلحة الأحوال المدنية..
أعطاه نصف الرغيف فكفت عن تقميع البامية وتناولته
من يده واجترته في صمت حتى أنهته تماما.

- بالهنا والشفاء.. كانت مدام عفاف بتستأذنك في كتاب
قانون الأحوال المدنية.

أخرجت مدام مها كتابا من تحت حلة البامية وناولته إياه
بدون أية كلمة، فأخذه «بلال» وأسرع به نحو عفاف التي
ألقتة على مكتبها دون اكتراث، ثم قلبت في أوراقه حتى
توقفت عند فصل من فصول الكتاب:

- بص يا سيدي.. انت بس عشان شكلك ابن حلال..
حسب قانون الأحوال المدنية لو قدرت تجيب لنا من
السجل المدني الي إنت اتسجلت فيه إن فيه غلط في الدفاتر
ممكن نحل لك المشكلة.

- فعلا؟

- آه.. انت اتسجلت فين؟

- في روض الفرج.

- خلاص اطلع على السجل المدني في روض الفرج وهات
منهم ما يفيد إن الدفتر متسجل فيه شخص واحد فقط مش
اتنين وأنا أساعدك بعد كده.. هو ذا الحل الوحيد.

خرج «بلال» من السجل المدني بالعباسية مستغرقا في التفكير.. فالذهاب إلى روض الفرج الذي لا يعلم أين هو يعتبر مغامرة غير مأمونة العواقب.. فضلا عن شكّه في أن هذه توزيعة جديدة من مدام عفاف كي تتخلص منه وتهرب من مشكلته.. إلا أنه بعد التفكير قرر المضي في المشوار حتى نهايته.. فليس لديه ما يخسره.. استقل سيارته واتجه من فوره إلى شبرا.. شبرا الموطن الأصلي للتكدس والزحام والالتحام، وأخذ يسأل المارة عن كيفية الوصول إلى قسم شرطة روض الفرج.. وهنا يظهر الفارق بين نوعين من المواطنين.. فعند السؤال عن الطريق في الشارع هناك من «يَدِلُّ» وهناك من «يُضِلُّ» وهو الأكثر شيوعا.. وقد كانت هذه عينة من الأجوبة التي تلقاها:

- قسم روض الفرج.. دا بعيد جدا.
- قسم روض الفرج.. طب وإنّ إيه اللي جابك هنا؟
- قسم روض الفرج.. قسم روض الفرج.. لا حضرتك دا مش هنا خالص.
- روض الفرج.. هم قالوا لك فين؟
- خش يمين اللي جاي واسأل تاني برضه.
- شايف بتاع الموز اللي هناك.. وحش ماتشتريش من عنده (سرحان عبد البصير ستايل).

بعد الكثير من السؤال والتساؤل والتوهة والدوخة وصل أخيرا إلى الشارع المنشود ليفاجأ أن الشارع مسدود من منتصفه هو وكل الشوارع المحيطة بالقسم، ومنوع دخول

السيارات إلا إذا كنت ضابط شرطة أو تعرف ضابط شرطة أو شكلك شكل ضابط شرطة.. فيما عدا ذلك عليك أن تركز في آخر العالم - كما قال السادات - وتذهب إلى القسم مشياً على الأقدام.. تحت الشمس والعرق والتراب والغضب اتجه «بلال» إلى بوابة القسم ليجد أحد أمناء الشرطة يعترضه على مدخل البوابة:

- على فين يا أستاذ؟
- طالع السجل المدني.
- وعائزهم ليه؟
- عادي مواطن وعائز السجل المدني.
- هو أي مواطن يعوز السجل المدني؟! عائز منهم إيه يعني؟
- هاسأل على حاجة في القيد العائلي.
- هممم.. القيد العائلي.. معاك بطاقة؟
- يعني هم اللي مش معاهم بطاقة ما بيطلعوش السجل المدني؟
- لأ، يا خفيف.. بيطلعوا على طره.
- لأ، ولا طره ولا غيره.. خد يا سيدي البطاقة أهى.
- البطاقة دي متتهمة.. ممنوع تدخل بيها.
- يعني إيه ممنوع؟!
- مينفعش تدخل القسم إلا لو معاك بطاقة سارية.. لازم تجردها.

- حاضر.. أجدها منين بقي؟
- من السجل المدني فوق.
- ما قلنا كده من الأول.. تسمح لي أطلع أجدها؟
- لأ.. بطاقتك منتهية ولازم تجدها قبل ما تطلع على السجل المدني.
- طب إزاي يعني.. البيضة ولا الفرخة!
- دي تعليمات يا أستاذ.
- أشار له «بلال» بورقة نقدية من فئة العشرين وقال بلهجة ذات مغزى:
- معلش والنبي عديني المرة دي وانا عنيا ليك.. وبعد كده أوعدك هاجد البطاقة بعد كده كل ست ساعات.
- قال الرجل على مضض:
- ماشي المرة دي بس.
- كتر خيرك.
- أخذ أمين الشرطة منه البطاقة وسجل بياناتها ثم قال له:
- حضرتك بقى تيجي بكرة الصبح.
- ليه بقى؟
- الساعة عدت واحدة يا بيه.. كل الموظفين مشيوا.
- ويعني كان لزمته إيه التحقيق دا بقى؟
- إجراءات أمن يا بيه.. اتفضل وتعالى بكره.. وهات معاك البطاقة، وتكون مجددتها.
-

كالعادة انصرف «بلال» بخفي حنين، وخرج من شبرا متجها إلى بيته عازما على النوم حتى صباح اليوم التالي كي ينتهي هذا اليوم المحبط.. في طريقه إلى المنزل اتصل به «عادل» تليفونيا متسائلا عن آخر الأخبار:

- مفيش هاروح بكرة السجل المدني أجيب ورقة إن الدفتر فيه غلط في التسجيل.

- أيوة بقى.. كده أنت دخلت على فيلم عوكل يا معلم.. والراجل العجوز اللي هايحب لك الدفاتر من الأرشيف ويولع في الدفتر.

- إلهي يولعوا فيك يا بعيد.. إيه الذاكرة السينائية الجامدة دي؟

- يابني الدنيا سيبا في طبيعتها كلها أفلام على رأي أغنية المرجيحة، واللي بيحصل لك دا أكبر دليل.

- اعمل لي فيها بقى جورج أبيض.

- يا عم لا جورج أبيض ولا جورج سيدهم.. أنا بارسيك على الحوار.. بكرة تخلي بالك من السبرتاية عشان الدفتر مايتحرقش.. أنت حر بقى.

- عموما مايفيش حل تاني.. خيلنا ورا الكداب لحد باب الدار.

في اليوم التالي تواجد «بلال» أمام مكتب السجل المدني بروض الفرج وبعد إنهاء الإجراءات الأمنية من قبل أمين شرطة يمस्क بباذنجانة مخللة ويتمز مز بها أثناء تسجيل البيانات في دفتر زوار القسم، ثم أرشده إلى حيث السجل

المدني بإشارة متعالية من إصبعه.. اتجه «بلال» للسجل المدني ودلف إلى مكتب إحدى الموظفين ليلحق بها قبل أن تنهمك في أكل إفطار الصباح:

- صباح الخير.

- هو إحنا لحقنا.. خير يا أستاذ.. إنت بايت هنا ولا إيه؟

- معلش يا أستاذة أنا قلت ألحق من بدري قبل ما تنشغلوا في فطار أو شغل أو أي حاجة.

- ما هي الولية أم دعاء اتأخرت بالفطار.. مش عارفة إيه اللي أخرها.

- ربنا يجيها بالسلامة.

- خير يا سيدي عايز إيه على الصبح كده؟

حكى لها «بلال» عن تفاصيل مشكلته وأنهى حديثه قائلاً:

- وقالوا لي إني لوجبت من هنا ما يفيد إن الدفاتر مافيهاش «جلال» يبقى المشكلة هاتحل بسرعة إن شاء الله.

- مكانش يتعز يا أستاذ.. مش هاقدر.

- ليه بس يا ستي؟ هادور معاكي في الدفاتر.

- دفاتر إيه بس يا أستاذ.. الدفاتر كلها اتحرقت في ثورة ٢٥ يناير المجيدة.

- اتحرقت؟!

تذكر بقهر سخرية «عادل» وفيلم عوكل الذي حُرق فيه الدفتر المسجل به.

- آه وشرفك.. كان فيه ثوار شرفاء في التحرير.. وناس شرفاء تانيين هجموا على القسم وحرقوا كل اللي فيه بمنتهى السلمية.. والدفاتر كلها اتحرقت من ساعتها.

- دول مش الثوار حضرتك.

- ثوار مش ثوار بقى مش شغلي.. أهم كتر ألف خيرهم حرقوا الدفاتر وريحونا من البحث والتدوير على اسم كل من هب ودب.

- يعني مافيش أي نسخة من الدفاتر دي؟

- نسخة من إيه بقى.. ما خلاص.. كان غسل واتغسل.

- يادي المصيبة.

- ماتقولش كده.. كله خير إن شاء الله.

- كده الوظيفة هاتروح عليا.. آخر أمل ليا كان في الورقة دي.

- ممكن أديك ورقة إن مافيش دفاتر عندنا لأنها اتحرقت في الثورة.

هتف «بلال» مكملًا:

- المجيدة.

- طبعا مجيدة.

- ودي أعمل بيها إيه.. ما هي مش دليل إن مافيش «جلال».

- مش عارفة.. يمكن تفيدك.. استنى صحيح.. أنا جت لي فكرة.

- خير؟
- عارف ممكن تلاقي نسخة من الدفتر فين؟
- سألها «بلال» في لهفة:
- فين؟
- في دار المحفوظات في القلعة.. بس احتمال صعب.
- أهو احتمال وخلص.
- وعموما آدي ورقة تقول إن الدفتر اتحرق وما فيش أي بيانات غير اللي على الكمبيوتر.
- يا ريته كان اتحرق بجاز الكمبيوتر هو كمان.
- يلا يا راجل أحسن عشان نبطل الشغلانة الهم دي.
- عموما متشكر.. كتر خيرك.. سلامو عليكم.
- مستعجل على إيه ماتقعد تفطر أم دعاء زمانها جاية..
- جاية فلافل وحاجات.
- اتجه «بلال» من فوره إلى القلعة حيث دار المحفوظات..
- متمسكا بأنامل الأمل البسيط الذي يلوح بضعف في الأفق..
- فقد يكون الحل في دار المحفوظات التي من صميم عملها
- القيام بحفظ كل الوثائق والمستندات في نسخ زنكوغرافية*..
- اتجه إلى الباب ليحده مغلقا كعادة أبواب القدر في وجهه هذه
- الأيام.. ووجد أحد العمال بجوار الباب فسأله:
- هم الموظفين مشيوا ولا إيه؟

* إيه زنكوغرافية دي؟!

- خير عايزهم في إيه؟
- أصل في وثيقة كنت عايز أعرف في نسخة منها هنا ولا لا؟
- وثيقة مهمة؟
- مهمة جدا.. مسألة حياة أو موت.
- وثيقة أثرية يعني؟
- هي قديمة بس مش لدرجة أثرية.. يعني بقى لها يبجي ٣٥ سنة بس.
- لا اتطمئن يا بيه.. احنا هنا عندنا وثائق من مئات السنين.. بس وثيقة إيه دي برضه اللي انت عايزها؟
- وثيقة ميلاد.
- ميلاد شخصية تاريخية ملك أو خديوي مثلاً؟
- لألاً.. مش قديم قوي كده.. دي شهادة ميلادي أنا.
- سأله باهتمام حقيقي:
- هو حضرتك خديوي؟
- لأ.
- يبقى إنت جاي تهزري بيه.. يلا اتكل على الله معندناش وثائق هنا.
- ليه بس.. مش من حقي أطلب شهادة ميلادي ولا إيه؟
- يا بيه المواطنين العادة اللي زيكم يطلعوا الشهادات من السجل المدني.. دار المحفوظات دي للشخصيات المهمة.
- هو انا ما قتللكش.. مش الدفاتر اتحرقت في الثورة المجيدة.

- دفاتر!! هو لسه حد بيطلع شهادات ميلاد من الدفتر..
أمال الكمبيوتر راح فين؟

- لأ ما هو في مشكلة عائلية كده بيني وبين الكمبيوتر مش
عارف أحلها.. وبعدين إنت هاتصاحبني.. فين الموظفين
خلليني أسألهم؟

- طلبك مش هنا يا أستاذ.. إحنا مابنحفظش هنا الحاجات
دي.

- أمال بتحفظوا إيه هنا؟ قرآن؟

- طبعاً.. عندنا مصاحف أثرية و...

- خلاص يا عم أنت هاتعملي فيها مرشد سياحي.. سلام.

غادر «بلال» محيط دار المحفوظات بالقلعة والغبار يتطاير
تحت شمس الظهيرة وتتطاير معه حبات الأمل في وجود
نهاية اللوتين والبيروقراطية اللامتناهية في هذا البلد.. وتذكر
الحالات التي كان يقرأ عنها في الصحف والمجلات عمن
يقف أمام الموظف بشحمه ولحمه فيطلب الموظف منه
إثباتاً أنه حي يرزق، وأن يدلل على ذلك بشهادة من اثنين
موظفين عموميين لا يقل مرتبهما عن مائة جنيه، كان يقرأ
هذه الحكايات ويضحك معتقداً أنها من نسج خيال محرري
الصحيفة حتى وجد نفسه في وسط حكاية أغرب من
الخيال.. بنهاية اليوم قام بتحضير بعض الأوراق التي طلبها
المحامي وتركها في المكتب عازماً على زيارة مدام عفاف في
الصباح التالي لاستشارتها في حالته بعد احتراق الدفاتر في
روض الفرج.

في الصباح توجه «بلال» لأحد مطاعم الفول والفلافل القريبة من الأحوال المدنية بالعباسية، واصطحب باقة من الساندوتشات الخفيفة والثقيلة كي لا يدخل على مدام عفاف خالي الوفاض.. فبالنسبة لمدام عفاف قد يكون الفول كفيلا بإثارة شفقتها عليه وتجد له حلا آخر بعد أن سدت الطرق في وجهه.. دخل من بوابة المبنى وألقى نظرة على اللافتة السوداء الكثيرة «السجل المدني»، وبدأ له أن إزالة النقطة من تحت «الجيم» ستجعل اللافتة أكثر منطقية.. عبر من تحت اللافتة واتجه صوب مكتب عفاف ودخل عليها ليجدها تهم بالبدا في تناول الإفطار فبادرها:

- صباح الخير يا مدام عفاف يا عظيمة.

- هو أنت.. أنت إيه يا بني.. مربوط بأستك؟! كل ما نبعثك في حنة ترجع لنا ثاني.

- معلش بقى يا مدام عفاف.. ايه الي في إيدك دا صحيح؟

- فطار.. عشان أصطحب وافوق لك إنت وغيرك.

- ودا فطار دا برضه.. دا أنا جيب لك فطار ملوكي.. فول اسكندراني وفول بالصلصة وفلافل محشية وجبنة مقلية وبطاطس مهروسة وبابا غنوج وبيض مسلووق وبتنجان مقلي ومخلل وسلطة ورز بلبن وبيبي دايت.

- بس؟

- بألف هنا وشفا.

- ليه دا كله يعني؟

- يدوب عشان يكفي.. آآ.. قصدي مش كتير عليك يا

مدام عفاف.. وبعدين دا إنتي اللي هاتخلي لي مشكلتي مع الكمبيوتر يبقى لازم أعمل اللي يرضيكي.

سألته وهي تهبر ساندويتش الفلافل هبرًا:

- إنت كانت إيه مشكلتك كده فكرني؟

حكى لها بإيجاز عن مشكلته مع «جلال» والكمبيوتر والسجل المدني ورحلته إلى القلعة وعودته خالي الوفاض.. استمعت مدام عفاف لحكايته، ثم نظرت للساندويتشات الماثلة أمامها كأسرى حرب ينتظرون مصيرهم من قائد الأعداء، ثم حكمت على ساندويتش البطاطس المهروسة بالإعدام هبرًا، وقررت تنفيذ الحكم فوراً فألقته إلى فمها وأعملت فيه صفيين من الجنود الأشداء ثم قالت:

- بص يا أستاذ بلال.. الحل الوحيد إنك تجيب شهادة وفاة لـ «جلال»، وتخلص منه ومن سيرته الغم دي.

- شهادة وفاة؟!!

- أيوة.. ساعتها يتكتب في القيد العائلي إنه متوفى ويبقى كأنه مالهوش وجود أصلاً.

- ودي أعملها إزاي دي بقي؟

- مش عارفة.. بس ممكن تسأل بقي حد من الموظفين القدام وهو يدلك.. وتعالى لي بكرة قل لي عملت إيه.

- بكرة؟!!

- أيوة.. بكرة وبعده.. وتعدي عليا كل يوم.. بس متجيش بإيدك فاضية.

قالتها بلهجة ذات مغزى وهي تشير لهضبة الفلافل الماثلة

أمامها في طبق الاتهام.. ففهم «بلال» قائلا:

- آآآ.. من عنيا.. كل يوم من دا.. أنا بقيت مورد التمويل
الخصوصي بتاع حضرتك.. عن إذنك.

انصرف «بلال» من مكتب مدام عفاف بعد أن قررت أن
يكون هو المسئول عن وصول الدعم الغذائي لمستحقه وقد
فتحت أمامه بابا جديدا للأمل.. واتصل بصديقه «هاني»
المحامي في التليفون ليستشيريه فيما استجد من أمل:
- ألو يا «هاني» إزيك.

- إزيك إنت.. أنا استلمت الورق.. ناقصه شوية أختام
وتوقيعات وتصديقات بس أنا هاتصرف.. الموضوع هياخذ
وقت وشوية مصاريف لحد ما ارفع القضية.

- لأ استنى قبل ما تتصرف.. في حل تاني غير القضية.

- حل إيه؟ يا بني ما فيش غير القضاء المصري الشامخ.. هو
صحيح بيتأخر.. إنما بيتأخر بشموخ.

- ما هو عشان بيتأخر أنا قررت ألجأ لحل تاني.

- بس أنا خلاص رفعت القضية.

- أنت مش لسه قايل إنك هاتصرف ولسه قدامنا وقت
طويل!

- لا ما أنا اتصرفت خلاص.. عموما هاتصرف وألغيها بس
دا هايكلفك شوية.. المهم.. قل بقى إيه هو الحل التاني؟

- شهادة وفاة.

- إنت عايز تموته يعني؟

- أموت مين يا بني إنت.. أموت واحد مش موجود أصلا.. أنت هاتلبسني قضية؟!

- قصدي يعني تموته على الأوراق الرسمية.
- آه.

- طيب قول كده.

- أديني قلت كده.. عندك حد ينجزنا في المشوار دا.

- أنا كنت أعرف حد لكن مش عارف لسه شغال في الحاجات دي ولا لأ.. عموما هاسأل وأقول لك.

- ماشي بس متأخرش عليا.

- مسافة السكة.. يلا سلام.

انتظر «بلال» ردا من «هاني» طوال اليوم لكنه لم يرد فاتجه
بنهاية اليوم إلى ملتقى الأصدقاء ليجد «عادل» قابعا في ركنهم
المعتاد.

- إنت فين يا عم بقى لك يومين مش ظاهر؟

- أديني مسحول والله في الموضوع الزفت اللي جالي دا.

- وآخر الأخبار إيه.. خلصته؟

- لسه بدري.....

قص عليه «بلال» مستجدات الأحداث وسرد له موضوع
شهادة الوفاة:

- كده الموضوع اتعقد خالص.

- هانعمل إيه بقى.. بلدنا كده وآدي الروتين.. هانكفر

بالبلد؟ نشوف بلد تانية بتحترم البني آدمين لا سمح الله! كل

مواطن بياخذ نصييه.

ضيق «عادل» عينيه مفكرا:

- طيب وإنّ عايز تخلص منه ليه؟ أنا بقى هاقول لك
على خطة أحسن.

- خطة إيه؟

- إنت هاتطلع بطاقة رقم قومي لـ «جلال» بصورتك..
ونضرب له عقد ملكية لقطعة أرض ودي حاجة سهلة جدا
على فكرة، وبضمان الأرض ناخذ قرض كبير من البنك..
ونطلع له باسبور وتسافر على أي بلد في الدنيا وترجع
بباسبورك الأصلي.. «بلال» يعني.. وهوبّا «جلال» يضرب
على فلوس القرض والحكومة والبنك يدوروا على «جلال»
بقى ويثبتوا إنه حي وله كيان.. ونكون احنا بتتنغغ في العز
والنعيم.

- إحنا؟!!

- أيوة.. أنا وأنت ما أنا هأخذ نص المبلغ.. مش أنا
صاحب الفكرة.. ولا عايز تفرقعني.

- لأ، طبعاً.. أوعدك لو الموضوع ماتحلش هاعمل كده..
وهابقى الحكومة هي اللي جابته لنفسها.

- حكومة تستاهل.. واحنا نستاهل كل خير.

هنا رن جرس التليفون المحمول الخاص ببلال.. كان
«هاني» هو المتصل.

- أيوة يا «هاني».. عملت إيه؟

- فرجت يا سيدي.. لقيت لك اللي هايخلص.

- قل لي.

- واحد شغال في المشرحة.. هانستنى حادثة بيعجي فيها مجهول.. الراجل هايكمّر الجثة ويقول إنها بتاعت «جلال».. ونطلع تصريح دفن باسمه ثم شهادة وفاة سليمة ورسمية.

- بس دا كده الموضوع كبير قوي.. أنا كنت فاكر هانطلع شهادة وفاة بس.. مش جثة ومشرحة وحاجات كده.

- لا طبعاً.. عشان نعمل الغلط لازم نعمله صح.. وأهم من الشغل ظُبط الشغل.. وبعدين دا الراجل هايكرمنا عشان معرفة قديمة.

- هايكرمنا إزاي.. هاينقي لنا جثة طازة يعني؟

- لأ هايكرمنا في السعر.. هايأخذ عشرة آلاف جنيه بس.

- بس! لا دا كده يبقى كرمنا قوي.. خلاص سيبني أفكر وأرد عليك.

- بس بسرعة عشان عنده بضاعة جاهزة والحاجات دي لُقَطْ.. عايزين نلحق.

- لُقَطْ! هو إحنا بنجيب شقة من ابني بيتك؟ عموماً هابقى أكلمك.. سلام.

سأله «عادل» عن فحوى المكالمة فأخبره «بلال» بالتفاصيل.

- أويّا.. كده يا معلم قلبنا على فيلم احترس من الخط بتاع عادل إمام.. وصلت للزعيم مرة واحدة.. هنالك يا عم.

- خرينا كده ندخل على فيلم ونخرج من فيلم ولا حد

عارف يحل المشكلة!

في اليوم التالي قرر «بلال» اللجوء إلى أحد المسؤولين الكبار في الأحوال المدنية عليه يكون لديه حل آخر غير الالتواء والتحايل على القانون.. اتجه من جديد إلى المصلحة فوجد مكتب أحد الضباط المسؤولين عن الشئون القانونية طرق الباب فلم يسمع صوتا يدعوه للدخول فطرق مرة أخرى.. ثم تجرأ ففتح الباب بحذر ليجد الضابط الذي يحمل على كاهليه رتبة عقيد يجري حوارا بروتينيا مع نصف فرخة بالسلطات وإصبعين من الكفتة ورغيفين.

- مساء الخير يا فندم.

- منهااهههور (مساء النور بفم مليء بالطعام).

- من فضلك أنا عندي مشكلة وكنت عايز أسأل حد مسئول على حل ليها.

- الموظفين كلهم مشيوا.

- أmaal سيادتك مين.

- أنا العقيد وحيد من الشئون القانونية.. بس التعامل مع المواطنين أمثالك يبقى مع الموظفين مش معايا شخصا.. وبعدين دي ساعة غدا.

- معلش أنا آسف والبركة فيك والشرطة في خدمة الشعب

و....

- خلاص إنت هاتشحت.. احكي بس بسرعة.

قص عليه «بلال» الموضوع بالتفصيل ويبدو أن العقيد وحيد وجد الحكاية مسلية فأخذ يستمع وتظهر على وجهه

آثار الاستمتاع بالفرحة التي يبدو أنها كانت جيدة الشواء..
انتهى «بلال» من قصته وانتظر ريثما ينتهي الضابط من
غذائه ولعق أصابعه ثم قال:

- بص يا أستاذ.. الموضوع بتاعك دا مالهوش غير حل من
ثلاثة.. قضية ومحكمة.. شهادة وفاة لـ «جلال».. أو شهادة
ميلاد ورقية من بتوع زمان تثبت إن «جلال» هو «بلال»
وحصل خطأ في النقل من الدفتر للكمبيوتر.

- ودي أجيبها منين؟

- من السجل المدني الي إنت متسجل فيه.

- ما هو سيادتك اتحرق في الثورة المجيدة زي ما قلت لك.

- خلاص شوف أي جهة رسمية تكون مقدم فيها شهادة
ميلاد ورقية.. جامعة.. مدرسة.. أي حاجة.. وخذ ملفك
وهات لنا الشهادة وأنا أخلص لك الموضوع.

- مدرسة.. والله فكرة.. شكرا يا وحيد باشا.. ربنا يخليك
للناس.

انصرف «بلال» وهو ينوي زيارة مدرسته القديمة في
اليوم التالي.. فهو يذكر جيدا أن ملفه كان يحتوي على عدة
شهادات ميلاد ورقية قديمة.. دعا «عادل» ليرافقه في رحلته
إلى المدرسة.

- طبعا عارف دا يبقى فيلم إيه؟

- إيه؟ مدرسة المشاغبين؟

- لا يا حبيبي.. دا فيلم الناظر بتاع علاء ولي الدين.. على
الله بس نلاقى الناظر زي ما هو ماتغيرش.

- ماشي.. معادنا بكرة الصبح.

في الصباح التالي مر «بلال» على صديقه «عادل» ليذهبا معا إلى مدرستهما القديمة.. وجد «عادل» يرتدي زي المدرسة البنطلون الكحلي والقميص اللبني ويحمل حقيبة مدرسية صغيرة.. حتى شعره أنامه على أحد جانبيه فبادره «بلال» ساخرا:

- إيه يا بني المنظر اللي انت عامله دا؟

- أهو باسترجع الذكريات.. بس كيس الساندوتشات مش عايز يدخل في الشنطة.

- كمان ساندوتشات!

- طبعاً آمال هنعمل إيه في الفسحة.. يلا بينا بسرعة بقى على المدرسة.

اتجه «بلال» و«عادل» نحو المدرسة وأخذوا يسترجعان ذكريات الطفولة والدراسة والتزويغ المدرسي البريء الذي كان يتبعه لعب الكرة لساعات طويلة.. مرا بجوار سور المدرسة الذي طالما مارسا قفزة الثقة من فوقه فلم يجدوا أي طالب يقفز من فوق السور مما أثار دهشتهم.. يبدو أن طلاب هذا الجيل لا يزوغون تركيزاً في الحصص الدراسية.. وبوصولهما إلى باب المدرسة الأخضر الكبير وجداه مفتوحاً على مصراعيه بدون حارس أو بواب.. هذا الباب يذكر «بلال» أنه كان موصداً بالسلاسل والجنائز والمتاريس وأربعة كلاب بلدي مسعورة والعديد من أعضاء سلاح الشرطة المدرسية المدججين بالعصي والخراطيم ودفاتر الغياب لمنع

أي طالب تسول له نفسه الاقتراب من باب المدرسة.. وتذكر أيضا استغلال أحد الفراشين امتلاكه مفتاح قفل الباب وكان يعرض على الطلبة تعاطي رشوة عشرة جنيهات كي يخرجهم من المدرسة.. كان هذا مبلغا كبيرا للغاية في ذلك الوقت يكفي لخروج الطالب من جهم نفسها*.. أما الآن فالباب مفتوح ولا أحد يخرج منه.. ماذا هناك؟! اتجهها مباشرة إلى مكتب الناظر فلم يجد أي فراش أو ساع أمام باب مكتبه.. طرقا الباب ودخلا فوجدا المدير لم يتغير منذ كانا في الثانوية العامة.. لم يتغير شخصه فقط، ولكن كل شيء آخر فيه قد تغير.. صوته وهيئته وقوته.. أصبح -بالطبع- أكبر سنا.. وأضعف.. واهن الصوت متعبه.. ما أن رأهما حتى رحب بهما ودعاهما للجلوس على غير عادته حيث كان ترحيبه بأي طالب أيام زمان بآلة اخترعها بنفسه تجمع بين قوة الخرطوم ولسعة الكرباج وصلابة العصا وإهانة الشبشب.. وكان يسميها «الفرقلة».. نظر «عادل» في المكتب عن الفرقلة سالفة الذكر فلم يجدها.. تقدما من المدير وبادره «بلال» محييا:

- إزاي حضرتك يا أستاذ حامد.
 - أهلا يا بني.. اتفضلوا اقعدوا.
 - إحنا كنا طلبة في المدرسة دي في ثانوي.
- قال المدير بأسى:

* في الواقع لم يكن هناك فارق بين جهم والمدارس الحكومية.

- طالما قلت يا «أستاذ» تبقى أكيد كنت هنا من أكثر من عشر سنين.

- مانا لازم أقول «أستاذ» يا أستاذ.. أمال هقول لحضرتك إيه يعني؟

- كمان حضرتك!! فكرتني بأيام زمان.

- ليه يا أستاذ.. هو الطلبة بتقول لحضرتك إيه دلوقتي؟

- الطلبة.. وهما فين الطلبة؟ دا أنا بقى لي أسبوعين مشفتش حد فيهم.. طب والله وحشوني ووحشتني دوشتهم.

- يعني إيه؟ مايجوش؟ طب والغياب!

- ومين بس اللي هاياخد الغياب؟

- المدرسين يا أستاذ حامد.

- والله وحشوني هما كمان.. كلهم بيعجوا يمضوا ويمشوا
عشان الدروس.. وبيأخدوا الطلبة معاهم.. والباب مفتوح
أهوزي مانتم شايفين اللي عايز يدخل يدخل.. واللي عايز
يخرج يخرج.

- طب وفين.. الموجهين.. مشرفين الدور.. رائد الفصل..
مشرف الإعدادي والثانوي.

- كلهم يابني مشغولين في الدروس الخصوصية.

- يعني الطلبة مابتجيش خالص؟

- لأ طبعاً.. ساعات بيعجوا يأخدوا جدول الامتحان..
يأخدوا رقم الجلوس.. يأخدوا بحسّي ويشقروا عليا.. غير
كده مفيش.

- دا الدنيا اختلفت خالص.. أنا كنت فاكرا هاجي لأقبي المدرسة زي زمان.

- وهو إيه يابني لسه زي زمان.. زمان كان اللي يتكلم فيكم في الفصل المدرس يعمل عليه حفلة.. وكان آخركم تلعبوا بالأقلام.. تلعبوا أفلام.. تاكلوا ساندويتشاتكم أثناء الحصة.. آخر أيام حضور الطلبة هنا كانوا كلهم شغالين باللباتب والتبالت* والمدرس شغال ولا حياة لمن تنادي. طيب يا أستاذ حامد ماتكلم الوزارة.

- الوزارة مشغولة بالكادر الخاص والمظاهرات ومشاكل الموظفين وتسريب الامتحانات.. وأنت عارف إن ما بيعيشلناش وزير.. سيبك.. المهم انتم يا ولاد.. بقيتوا فين بعد ما سبيتوا المدرسة؟

- في الدنيا.. المهم أنا كنت عايز حضرتك في خدمة. - خير؟

- يا ترى الملفات بتاعتنا لسه موجودة ولا اترمت؟ - بص يابني.. أنا مارميتش حاجة من عشرين سنة.. الملفات كلها فوق السطح.. عايز إيه منها؟ قص له «بلال» الحكاية كاملة ثم أردف:

- لولقيت الشهادة الورق بنفس رقم القيد بتاع «جلال» وباسم «بلال» هاتوفر عليا وقت كتير جدا. - طبعا أنا مش هقدر أساعدك في التدوير.. السطح عندك..

* جمع «لابتوب» و«تابلت».

اطلع انت وصاحبك ودوروا ولو لقيت يبقى حظك
حلو.

- شكرا يا أستاذ حامد.. يلا يا «عادل».

صعد «عادل» و«بلال» إلى سطح المدرسة وألقيا نظرة على
فناء المدرسة الذي كان دوماً يعج بالطلبة الذين كانت أقصى
أمانهم انتهاء اليوم الدراسي والعودة إلى المنزل لمشاهدة أفلام
كارتون القناة الثالثة بعد الغداء.. بدا لهم الفناء موحشا
للغاية وهو خاو على عروشه إلا من كلب ضال كان يلبي
نداء الطبيعة داخل مرمى كرة القدم.. نفص «بلال» هذه
الأفكار عن رأسه وركز في أكوام الملفات الملقاة أمامه والتي
تمثل الكومة منها حجم حجر من أحجار الأهرامات، فضلا
عن أنها ليست مرتبة بأي شكل من الأشكال لا أبجديا ولا
بحسب التواريخ ولا أي شيء..

- هانبدأ منين يا عبكري؟

- مش عارف.. الموضوع كبير قوي.. تعالى نبدأ بالكومة
اللي هناك دي.

خاص الصديقان بين الملفات لمدة ست ساعات متواصلة
حتى عثر «بلال» بمعجزة ما على الملف المنشود وصاح في
فرح:

- أويوركا.. أويوركا.

- إيه يابني.. نحلة قرصتك؟

- نحلة إيه يا جاهل.. مش عارف أويوركا يعني إيه؟

- عارفه طبعا.. دا الجون بتاع ريال مدريد.

- يا عيني على العلام.. يابني أويوركا دي يعني وجدتها.
- وجدتها!! عيط احنا يا عصام.. وجدتها يعني آي فاوند
شي I found she
!She -

- أيوة.. مش الشهادة مؤنثة تبقى she.
- شي يا حم.... ولا بلاش.. أويوركا دي أرشميدس قالها لما
اكشف قانون الطفوف.
- مخدنهاش دي في الفصل.
- مش مهم.. المهم إننا لقينا الشهادة.. يلا بينا.
مرا في طريق عودتهما على مكتب المدير الذي سألهما
بصوت واهن:

- إيه يابني.. لقيت اللي بتدور عليه؟
- آه يا أستاذ حامد.. متشكرين جدا.
- العفو.. ابقوا تعالوا يا ولاد.. أنا على طول بابقى هنا.
- أكيد هانيجي يا أستاذ.. عن إذنك.
خرج الصديقان من المدرسة بأحاسيس مختلفة يغلفها
الشعور بالسعادة للحصول على الورقة التي سوف تنهي كل
هذا العذاب البيروقراطي.

نام «بلال» في هذا اليوم محتضنا شهادة الميلاد الورقية
شاعرا بارتياح شديد بعد أن أصبح يمتلك دليل برائته من
تهمة «جلال» في يده.. في صباح اليوم التالي توجه «بلال»
بالشهادة الورقية إلى مصلحة الأحوال المدنية التي صار

يعرف طريقها أكثر مما يعرف غرفته.. توجه مباشرة نحو مكتب العقيد وحيد ملوحا بالشهادة الورقية في يده.. نظر إليه وحيد بعدم اكتراث مشوب باللامبالاة مغلف بعدم الاهتمام محاط بالتجاهل فبادره «بلال»:

- باشا.. أنا جيت الشهادة.

- شهادة إيه؟

- شهادة ميلادي.

- ومالك فرحان كده ليه.. وبعدين انت لسه مطلع شهادة ميلاد دلوقتى! إيه الجنان دا؟!

- أنت نسيته ولا إيه يا باشا؟

- نسيته.. آه.. أحبك لا.. مالك ياخويا متأثر كده ليه.. هو أنا خالك ولا حاجة؟

- لا يا فندم العفو هو أنا أطول؟

- آمال إيه حكايتك؟

قص «بلال» قصته للمرة المليون في تاريخه وأنهى القصة بالجملة المنقذة:

- وحضرتك قلت لي لو جبت شهادة ورقية باسم «بلال» وبنفس رقم قيد «جلال» ممكن المشكلة تتحل.

فكر وحيد مليا ثم قال:

- طبعاً تتحل.. إنت تاخذ الشهادة دي وتطلع بيها على المحكمة وتجيّب لنا حكم قضائي.. وأنا أحل لك المشكلة فوراً.

- محكمة!! مش حضرتك قلت لي لو جبت الشهادة مش
هاحتاج لمحكمة؟!

- لأ أنا ماقلتش كده.. إنت كده أثبتت إن فيه خطأ في
تسجيل «جلال» وإن اسمه الحقيقي «بلال».
- الله ينور عليك.. يبقى مفيش «جلال».

- لأ.. يبقى فيه في الدفتر اتنين «بلال».. «بلال» برقم ٣٦
و«جلال» برقم ٣٧.. عليك بقى إنك تثبت إنهم واحد مش
اتنين اخوات.

- إزاي بقى اتنين اخوات يبقى لهم نفس الاسم؟
- قبل سنة ١٩٩٢ كان القانون لا يمنع تسمية الإخوات
بنفس الاسم.

- لا يا شيخ!
سمع بلال بصوت الخيال عادل يقول له «قشطة يا
معلم.. كده دخلت على فيلم كده رضا.. منة شلبي يا عم
مين قدك».. نفخ بلال هذه الأفكار سريعا وقال للضابط
بحدة لم يستطع تمالكها:

- بص يا حضرة الضابط.. انت لو عايز توزعني قول
بالذوق.. إنما تستخف بعقلي وتقول لي الكلام الفاضي دا
يبقى عيب.

- طب يا مواطن.. الكلام خلص.. وموضوعك يتحل في
المحكمة.

- ماشي يا ظابط هاروح المحكمة.. بس ربنا يسامحك على
التعنت اللي إنت فيه دا.

- يا ابني دي وظيفتي هنا أساسا.. اتفضل.

خرج «بلال» يجر أذيال الخيبة وشهادته الورقية.. حيث كان يعتقد أن المشكلة قد انتهت تماما بالأدلة والمستندات.. في طريقه وجد مدام عفاف على مكتبها ولدهشته لم تكن تمارس أي نشاط غذائي.. نادته فاتجه إليها ببطء:

- أنا شايفاك خارج من مكتب العقيد وحيد.. عملت إيه معاه؟

- ولا حاجة.. قال لي أروح المحكمة.. رغم إني جبت شهادة تثبت إن «جلال» هو «بلال» بس برضه مش عايز يقبلها.

- شهادة إيه؟

أخرج لها «بلال» الشهادة الورقية وجميع المستندات.. نظرت فيها مليا ولأول مرة بدا عليها الاقتناع بقضيته فقالت له:

- أنا كنت فاكراك بتحاول تحرم أخوك من وراث أو حاجة.. بس كده أنا اقتنعت بكلامك.

- طيب الحمد لله.

- ها أقول لك على حاجة.. فيه لجنة أحوال مدنية في الزيتون.. روح هناك واعرض مشكلتك.

- واللجنة دي بتنجز ولا هاتأخرنى سنين برضه؟

- لأ دي لجنة بتنعقد مرة كل شهر وتطلع قرار قضائي ملزم وواجب التنفيذ.. جرب وروح.

- وفين الزيتون دي أصلا؟

- روح واسأل بقى.. أدينى دلتك وأنت حر.

اتجه «بلال» إلى منطقة الزيتون ليسأل على الأحوال المدنية الموجودة بها.. وبعد سؤال من يعرف ومن لا يعرف وصل أخيراً إلى المبنى الرمادي الكئيب في شارع أضيق من خُلق أمناء الشرطة في إشارة مرور مزدحمة.. على باب المبنى سأل عن الشئون القانونية فدّلّوه على الدور الثالث.. اتجه إلى السلم وصعد وسط زحام عشرات الآلاف من البشر الزاحفين إلى السجل المدني لحل مشاكلهم مع الحكومة.. فهناك جورجيت عازر صليب المقيمة في الأحوال المدنية كمسلمة وتابعة لإحدى الطرق الصوفية، وهناك عصمت محمد حشمت التي تجاهد لإثبات أنها أنثى رغم أنها مسجلة على الكمبيوتر كذكر.. والواقع أن نظرة واحدة لعصمت تجعلنا نقترح أن يضاف تصنيف ثالث لخانة النوع ليكون هناك ذكر وأنثى ومزة.. هذا غير محمود عبدالعاطي حسن الذي يقاتل لإثبات أنه حي في حين لا تصدقه الوظيفة المختصة وتصدق شاشة الكمبيوتر التي تفيد أنه قد توفي في غزوة أحد.. وعرف «بلال» أن لعنة الكمبيوتر لم تصبه وحده.. أكمل طريقه نحو مكتب الشئون القانونية ليقابل المدير الذي استمع إلى شكواه بصبر وتأن غريبين ثم قام بتوجيهه:

- بص يا بيه.. موضوعك دا مع الأستاذ أحمد السيد* هو اللي هايحل لك القصة كلها.

*الاسم حقيقي.

- أحمد السيد دا ألاقه فين؟
- المكتب الي جاي يمين في يمين ورا الأرشيف.
- وصل «بلال» إلى المكتب المنشود فوجده يغص بالسيدات
البدينيات كعادة أي مصلحة حكومية، لم يكن صعبا عليه تمييز
الأستاذ أحمد من وسطهن فهو الرجل الوحيد في المكتب.
- صباح الخير.
- صباح النور.
- نعم؟!!
- إيه يا أستاذ.. بقولك صباح النور.. أوامر.
- أصل أول مرة حد يرد عليا الصباح.. أنا اتفاءلت بوشك
الخلو.
- خير يا بيه.. إيه الموضوع.
- قص عليه «بلال» قصته من أولها لآخرها واستمع إليه
أحمد السيد بمنتهى الاهتمام وسط رشقات من كوب شاي
ثقيل ثم هز رأسه متفهما وقال:
- بص.. الحل إنك تخلصها إداري.
- إزاي؟
- هتاخذ جواب تحريات من المباحث للقسم الي إنت تابع
ليه.. يجيولنا تحريات إن مفيش «جلال» وإن الوحيد المقيد في
الدائرة اسمه «بلال».. دي الخطوة الأولى.
- طب وبعد كده؟
- نخلص دي الأول وبعدين نشوف.
- طيب آخذ جواب التحريات منين؟

- من ضابط المباحث في الدور اللي تحت.

- شكرا يا أستاذ أحمد.

نزل «بلال» مسرعا إلى ضابط المباحث بعد أن ظهرت بارقة أمل جديدة.. طرق الباب لسمع بعض المهمات وسط نوبة من السعال الشديد فقرر أنها تعني السماح بالدخول ودلف إلى المكتب ليجد ضابط المباحث يسعل وكأنه سيلفظ روحه، فهرع إليه مسرعا ليربت على كتفيه فازداد احتقان وجه الضابط.. وأخذ يسعل في قوة أكبر فأخذ «بلال» ييسمل ويحوقل حوله:

- بسم الله الرحمن الرحيم.. عين وصابتك يا حضرة الضابط.. من شر حاسد إذا حسد.

فقط ليحمر وجه الضابط كثمرة الكريز -غير أنه من الصعب تشبيه وجه ضابط شرطة بالكريز- فناول «بلال» كوبا من الماء كان موضوعا على المكتب ليشيح الضابط بيده فينكسر الكوب وينسكب الماء على المكتب، ويواصل الضابط السعال وكأنه في مسابقة أولمبية لأطول سعلة في التاريخ حتى خشي «بلال» على الضابط أن يفقد حياته جراء السعال المتواصل فوقف خلفه وناول خبطتين بقبضة يده في منتصف ظهره تماما فهدأ السعال فورا واستعاد الضابط رويته وهدوءه فقط لجزء من خمسة ملايين جزء من الثانية قبل أن يصرخ في وجه «بلال»:

- أنت مين، ودخلت هنا إزاي، وإيه اللي انت عملته دا؟!!

- أنا يا فندم كنت عايز آآ...

- كنت عايز تموتني.. بتسقينني ميه وأنا باكح.. أنا إيش

- عرفني الميه دي فيها سم هاري ولا بلا أزرق؟
- يا فندم الميه دي كانت على المكتب مجبتهاش من بيتنا.
- تابع الضابط كأن لم يسمعه:
- ولما مانفعتش حكاية المية المسمومة كسرت الكوباية عشان تعورني بالقزاز المكسور.
- يا باشا أعورك إيه بس.. دا أنا الي أنقذتك من الكحة لما خبطتك على ضهرك.
- أهو دا يعتبر اعتداء على موظف أثناء تأدية عمله.. دي لوحدها تجبسك مؤبد ست أشهر. أنت مين زقك عليا يالا؟ أبو دومة ولا أبو شومة ولا البت سعاد بتاعت ألسن؟
- هو أنت عايز تجبسنني وخلاص.. طيب ما اعترف لك إن أنا الي عامل للأرض احتباس حراري ونخلص.
- لا أنت عايزني ألق لك تهمة زور.. أعوذ بالله.
- محدش هاعرف إنها زور.. لفق يا باشا خيلني أخلص من القرف الي أنا فيه.
- لا، يا خفيف مفقوسة طبعاً إنها تلفيقة.. لأنني لسه قابض عالواد بتاع الاحتباس الحراري الأسبوع الي فات.. واعترف.
- أنا بقى شريكه.
- أنت إيه حكايتك؟ عايز تتحبس ليه.. وراك إيه يلا؟
- شعر «بلال» أنه شهرزاد يقص قصة ألف ليلة وليلة وهو يعيد قصته على ضابط المباحث الذي طالع الأوراق بكل اهتمام وسط دخان سيجارته الكثيف ثم قال:
- طبعاً في «جلال».. الحسّ الأمني يقول لي كده.

- طبعاً يا باشا.. أمال مفيش.. أنا عايزك بقى تطلب
تحريرات القسم الي أنا تابع له عشان تثبت إن في «جلال»
وإن أنا مزور واتحبس بقى وأخد جزائي.
- آه.. إذا كان كده عنيا الاتنين.. دا أنا هاخرب بيتك.
- يبقى كتر خيرك.

- والتحريرات هاتجي لي وهاتسجن.
- الحبس للجدعان يا باشا.
- وأهو طالما مفيش احتباس حراري يبقى أي احتباس
وخلاص.. هاتحبس يالا.
- طيب بس حضرتك خلص لي الجواب على طول عشان
ماتأخرش على الحبس.
- من عنيا.

أخذ ضابط المباحث يكتب خطاباً مفصلاً للتحريرات
بقسم الشرطة التابع له سكن «بلال» وأمعن في ذكر
التفاصيل اعتقاداً منه أنه يلف الكلابشات حول معصمي
«بلال».. ثم سلم له الخطاب ممهوراً بتوقيعه.
- اختمه بقى من الصول بره واطلع على القسم بتاعك
على طول.

- شكراً يا فندم.. ربنا ما يحرمك من الافترا أبداً.
- على إيه بس.. يا بخت من قِدر وقِبي.
- انصرف «بلال» من مكتب الضابط حامداً ربه على
نعمة الخطاب، وأخذ يبحث عن الصول الذي سوف يختم
الخطاب حتى وجده فقدم إليه الخطاب.. نظر إليه الصول

نظرة خاوية متسائلا:

- نعم؟
- ختم.
- مفيش.
- يعني إيه مفيش.. ما الضابط مضى وقال لي فاضل الختم.
- الكلام دا كان من خمس دقائق.
- وإيه اللي حصل في الخمس دقائق.. صلاحية الإمضاء خلصت.. الجواب حمض؟!
- لا يا خفيف.. ساعات العمل الرسمية انتهت.
- يعني إيه.. الختم روح؟ راح يجيب الأختام الصغيرة من الحضانة.. ما الختم موجود وحضرتك موجود.
- دا صحيح.. بس انت عايزني أختم لك بعد الساعة ثلاثة.. دي مسئولية.
- معلش الختم مش هاشتكي والمصحف إنك شغلته بعد ساعات العمل الرسمية.
- ماقدرش.. أروح في داهية.. وانت مايرضيكش.
- يعني انت يرضيك أرجع المشوار دا كله عشان أختم الورقة.
- القانون كده يا أستاذ.. وبعدين تزعلوا إن القانون مش بيتطبق.
- لا، ونعم القانون.. نظر بلال حوله وقال بلهجة ذات مغزي: طيب لو عايزين نطبق القانون دا دلوقتي ونحطه في جيبنا ونختم الجواب وأنا عنيا ليك.. نعمل ايه؟

- متخافش معايا شمسية.

انطلق «بلال» خارجا من مكتب الأحوال المدنية طائرا نحو القسم التابع له، قاطعا المسافة حتى القسم في سرعة البرق - لو أن البرق يتعطل بسبب الإشارات أو بسبب أن برقاً آخر يقف صفاً ثانياً-، وما أن وصل إلى بوابة القسم حتى وجدها مغلقة ووجد أمامها أحد الجنود فسأله:

- هو القسم قافل ولا إيه؟

- مغلق للتحسينات.

- إيه دا.. هايحسنوا معاملتهم مع المواطنين؟

- مواطنين مين يا حضرة.. هايحسنوا الدهانات في مكتب المأمور وضابط المباحث والسيراميك في الحمامات بتاعتهم.
- آه.. اللهم قوي سيراميكهم.. طيب والي عايز يقابل ضابط المباحث يعمل إيه؟

- ادخل يا بيه.. هتلاقيه جوة بس حاسب من التراب والعفرة.

دلف «بلال» إلى القسم باحثاً عن ضابط المباحث ليجد مئات العمال الذين يعملون بمتهى الجدية والسرعة وسط أكوام من الركام والتراب والرمال.. ووجد المأمور واقفا وسطهم صارخا فيهم:

- القسم عايز أستلمه بكرة سوبر لو كس.. على المفتاح.

قال أحد العمال ساخطا:

- يا باشا دا بنك التعمير والإسكان بيسلم بعد ٣ سنين.

انفجر فيه المأمور:

- اخرس.. لما اقول بكرة الصبح يبقى بكرة الصبح..
خدوه عالجز.

- الحجز لسه ماتشطش.

- لا احنا عندنا هو الحجز كده.. 1/2 تشطيب وبيفضل كده
إذا كان عاجبك.. خده يا عسكري.

ظهر عسكري فجأة وجر العامل المسكين على الحجز،
وهنا لاحظ المأمور وجود «بلال» فبادره:

- أنت جيت؟

- أنا؟

- أيوة إنت.. كنت فين؟

- لسه جاي من الزيتون حضرتك.

- جبت الحاجة؟

أخرج «بلال» الأوراق مشيرا بها للمأمور:

- أيوة يا فندم جبت كل حاجة.

- كل حاجة إيه؟ مش شايف جبس في إيدك يعني؟

تحسس «بلال» جسده قائلا:

- لا ربنا ميحبش جبس ولا حاجة.. أنا دراعي سليم
الحمد لله.

- وهاتعمل الشغل ازاي من غير جبس؟

- لا، حضرتك الموضوع مش محتاج عنف.. لما أقابل رئيس
المباحث هاقول له على المطلوب وهو إن شاء الله يعمل.

- رئيس المباحث هو اللي هايعمل الشغل؟

- إيه؟ مواطن؟ يعني إيه الكلمة دي فهمني.. مواطن نوعك إيه؟

- نوعي إيه.. إنسان يعني.. ذكر.. إيه نوعي دي؟

- عندي في القسم نوعك يعني جاني ولا مجني عليه.. إنما مواطن وإنسان وبني آدم الحاجات دي معرفهاش.. مش عندي.

- حضرتك أنا مواطن مجني عليه وجاي ليا مصلحة من القسم.

- وإزاي يا مواطن تقتحم القسم وهو تحت الترميم؟

- أقتحم إيه بس يا باشا.. أنا أصلي عايز ظابط المباحث في مسأل...

- أنت هاتحكي لي قصة حياتك.. اتفضل من قدامي.

اتجه «بلال» إلى حيث يقبع ضابط المباحث في غرفة على الطوب الأحمر بها مكتب واحد وما أن رآه حتى هتف:

- إنت جيت.. بقى لي ساعة مستنيك.

- الباشا المأمور بس كان فاكرني بتاع الكرانيش.

- ههههه.. يعني الجواب ببيان من عنوانه.. شكلك باين قوي إنك مش بتاع كرانيش.

- ربنا يكرمك يا فندم.

أشار الضابط إلى جهاز كمبيوتر أمامه:

- بص بقى.. الشاشة بتاعت الكمبيوتر دي مش لاقطة أي حاجة وعلى طول سودا زي ما أنت شايف.

أيقن «بلال» أن الضابط يظنه مهندس كمبيوتر.. لا بأس..

نظر سريعا ليجد الكابل الخاص بكهرباء الشاشة غير متصل
بمصدر كهرباء، أخذ يعث في أزرار الشاشة ثم قام بتوصيل
الكهرباء فأضاءت.

- الله ينور عليك يا باشمهندس.

- دي حاجة بسيطة يا فندم.. أنا كان ليا عند حضرتك
طلب.

- خير؟

قص عليه «بلال» القصة من البداية إلى النهاية.. فكر
ضابط المباحث قليلا ثم قال:

- من عينا.. تحيلي بكرة الصبح يكون شيخ الحارة موجود
ويعملها لك.

- شيخ الحارة.. حارة إيه يا فندم؟ أنا ساكن هنا في مدينة
نصر.

- أيوة عارف.. هو اسمه كده.

- شيخ الحارة؟ في القرن الـ ٢١.

- وفي القرن الـ ٥١ شيخ الحارة هايفضل موجود.. النظام
نظام.. اتفضل يا أستاذ.

في المساء وعلى المقهى كالمعتاد كان «بلال» يحكي لـ «عادل»
آخر أخبار موضوع أخيه المزعوم.

- هو قال لك كده.. شيخ الحارة!

- أيوة والله.

- كده يا باشا فيلم التوت والنبوت.. بكرة تروح القسم
لابس لاسة وجلاية وأنا هاجيلك نبوت من واحد صاحبي

في فرقة الفنون الشعبية.

- يا عم أنت بتهزر.

- يعني كلامي أنا هزار.. وشيخ الحارة دا بجد؟

- آه والله بجد.

- لا أنا هاجي معاك بكرة أشوف شيخ الحارة دا وأتصور معاه سيلفي.

في صباح اليوم التالي اتجه الصديقان إلى قسم الشرطة وبادرا بالسؤال عن شيخ الحارة فأشار العسكري إلى شخص ذي شارب يرتدي جاكيت جلد ويضع نظارة شمسية رخيصة الصنع.. بدا من هيئته أنه أمين شرطة كما هو مذكور بالضبط في كتاب «كيف تكون أمين الشرطة»، كان الرجل يجتسي كوبا من الشاي مع سيجارة تحت أشعة الشمس مستمتعا بما يفعله وكأنه على شيزلونج في هاسياندا.. قال العسكري:

- الأمين علي.

- لا، حضرتك دا أمين شرطة إحنا عايزين شيخ الحارة.

- ما هو الأمين علي هو شيخ الحارة.

- شيخ إيه يا عم؟ في شيخ بلبس جاكيت جلد وجينز؟

- هو الأمين علي ومتوجعوش دماغني.

اتجه الصديقان نحو الشخص بتردد وألقيا التحية عليه:

- صباح الخير.

نفث الأمين دخانه نحوهما بصمت ولم يجب.

- حضرتك الحاج شيخ الحارة؟

أجاب دون أن ينظر إليهما وهو هائم في الملكوت:
- أيوة.

- معلش هانعطل حضرتك عن السيجارة والجاكت الجلد
شوية.

سألهم الأمين علي باهتمام حقيقي وهو يمسك طرفي
الجاكت بيديه:

- حلو الجاكت؟

- يجنن.. تحفة.. بعد إذنك كان ليا طلب تحريات من
مباحث الزيتون وكنت عايز حضرتك تشوفه.

- خير بخصوص إيه؟ سرقت حاجة؟ بتغير عنوانك؟ مقدم
على بطاقة تموين؟ عليك قضية نفقة؟

- لا والله ولا حاجة من دول.. أنا بس عايز حضرتك
تتحري إن مفيش حد اسمه «جلال» وإن هو «بلال» بس
الي موجود.

- مش فاهم حاجة.

قص عليه «بلال» أسطورة (جلال وبلال والزمان) وبدا
على شيخ الحارة الاهتمام الحقيقي بالأمر.

- مम्म انت قلت لي الجاكت حلو؟

- تحفة يا سيادة الأمين.. في منتهى الشياكة.. حضرتك
عرفت الموضوع؟

- أيوة.. عذاب الروتين.. عادي.. عشان يعرفوا ان
الكمبيوتر والسيستين والكلام دا مايغنيش عن النبي آدم.

- دا خصوصاً بقى إذا كان النبي آدم دا عنده جاكت زي

بتاعك دا.

- بجد حلو الجاكت؟

- والمصحف يهبل.

- طيب بص يا سيدي.. أنت هاتجيب لي وصل كهرباء من العنوان المثبت في بطاقة الرقم القومي، وهاتصور لي الرقم القومي بتاع الوالد والوالدة.. والرقم القومي بتاع اتنين شهود من جيرانكم.

- عنيا الاتنين.. نص ساعة ويبقوا عندك.

طار «بلال» و«عادل» تجاه محل إقامته ليأتيا بالمطلوب وعادا ليجدا أمين / شيخ حارة الشرطة جالساً في مكتبه الصغير الذي لا يتسع للمكتب والأمين معا إلا بمعجزة شرطية، وقد خلع الجاكت وعلقه على مسمار في الحائط.

- سيادة الأمين.. آدي صور البطايق والمطلوب كله.

أخذ الأمين يراجع الأوراق ثم مط شفتيه في امتعاض:

- لا أنا عايز صورة بطايق الوالد والوالدة في صفحة واحدة.

- مهو حضرتك مقلتش.

- لا قلت بس انت إلى كنت مركز في الجاكت ومسمعتيش.

- حاضر يا سيدي.

عاد «بلال» ليصور البطاقات بالشكل المطلوب ثم رجع للأمين فوجده يتحدث في التلفون.

- أيوة يا باشا.. تمام يا باشا.. لا حضرتك استنى هاتكتب ورا سعادتك.. أيوة..

أخرج الأمين ورقة وقلما وأخذ يكتب وراء محدثه أكثر

من ١٠ صفحات، استغرقت ما يقرب من ساعة كاملة،
حتى اقتربت المكالمة من نهايتها.

- أوامر يا باشا.. أوامر.. في رعاية الله.

ثم انتبه إلى «بلال» الذي بدا عليه فراغ الصبر.

- معلنش دا الباشا الكبير بتاعنا.. ها.. حلو الجاكت؟.. آآآ..
قصدي عملت الورق؟.

رد «بلال» بغیظ مقدما له الأوراق:

- أيوة.. اتفضل.

نظر الأمين للأوراق بعدم رضا وقال ناهرا:

- مين بس اللي قال لك تعمل كده.. أنا عايزهم صحيح
في صفحة واحدة بس فوق بعض مش جنب بعض.

- وهاتفرق إيه بس يا سيدنا الشيخ ما هيّ هيّ.

- لا مش هيّ هيّ.. ومش هاتعرفني شغلي.. اتفضل بقى
اعمل اللي طلبته لحد ما اطلع للباشا وأنزل.

ظل «بلال» في زيارات مكوكية بين المنزل ومكتب شيخ
الحارة أبو جاك نایلون حتى انتهى من كل الطلبات الغريبة
التي طلبها الشيخ والتي تضمنت إقرارات مكتوبة من والده
ووالدته بعدم وجود ابن يدعي «جلال»، واستمارات تعارف
للشهود، وفیش وتشییه حتى خیل له أنه سیتطلب منه صوراً
فوتوغرافية بزاوية ٤٥ في ضوء القمر ماسكا قيثارة.

- تمام كده.. الورق جاهز.. سييني بقى أعمل تحرياتي
وعدي عليا كمان أسبوع.

- كثير أسبوع مش ممكن يبقى أقل.

- مش ممكن .. دي إجراءات يا أستاذ.
- معلىش والله أصلي مقدم في وظيفة وهاتروح عليا .. وحية أغلى ما عندك .. وحية الجاكت دا ياشيخ تخلصني بسرعة.
- بس لو مكتتش حلفتني بالغالي .. خلاص .. ٣ أيام وتستلم النتيجة .

قضى «بلال» الأيام الثلاثة في ترقب شديد .. متخيلا أن كل من يقابله أو يدق بابه هو مخبر يقوم بالتحري عنه .. كانت البداية مع عامل الديليفري الذي دق جرس الباب فهرع «بلال» ليفتح، ولاحظ بعين ثاقبة أن الكاب الذي يرتديه العامل يخص شركة أطعمة أخرى غير التي ينتمي إليها العامل الذي بادره بتقديم الطعام وقال العامل وهو يناول بلال الوجبة المطلوبة:

- اتفضل يا بيه .. الحساب لو سمحت.
- لا والله معندناش حد اسمه «جلال».
- «جلال» مين يا بيه أنا عايز الحساب.
- انت عايز «جلال» ولا الحساب؟
- الحساب.
- من عنيا .. (وهتف مناديا): يا مامااااااا .. عندنا حد اسمه «جلال»؟

أتى صوت أمه من المطبخ:

- لا يا بني «جلال» مين بس؟
- قال «بلال» لعامل الديليفري:
- شفت .. مفيش «جلال» أهو.

36

مرت نحو نصف ساعة حتى انتهى الأمين من الكتابة وراء الباشا الكبير وطلب ورقتي إجابة إضافية ثم استدار لبلال:

- معلى أخرناك.
- لا ولا يهكم.. إيه الأخبار؟
- مبروك يا سيدي.. كل التحريات أثبتت إن مفيش «جلال» والي موجود هو «بلال» بس.
- يا فرج الله.. طب ماتيجي معايا لمدام عفاف تقول لها الكلام دا أبوس إيدك.
- مدام عفاف مين؟
- لا دا موضوع قديم كده.
- لا قديم إيه.. قل لي.. حلوة مدام عفاف دي؟
- يا باشا دا الجاكت بتاعك أحلي منها.. ألا هوفين صحيح مش شايفه في المكتب.. هو كويس؟ طمني عليه.
- لا سايبه في البيت النهاردة.
- انا افكرته راح يشوف جواكت قرايبه.. المهم ممكن آخذ ورقة بنتيجة التحريات.
- آه طبعاً.. بسيطة.. حضرتك هاتصور بطاقة الوالد والوالدة وش وضره.. و...
- قاطعه «بلال»:

- وعازيهم جنب بعض ولا بالعرض ولا بالورب؟
- لا لا مش هاتفرق المرة دي.. وتصور بطاقتك وتقدم طلب لضابط المباحث وتمضيه منه ومن البيه المأمور، وتيجي تاخذ

الورقة وتختتمها وخلاص.

- بسيطة فعلا!

اتبع «بلال» تعليمات شيخ الحارة بدقة حتى انتهت واستلم الورقة مهيورة بشعار الجمهورية.. النسر الأزرق الفخيم ضاماً جناحيه ومطأطأ رأسه في رفق وكأنه يرثي لحال المواطن الذي تعذب عذاباً يفوق عذاب كفار قريش للمسلمين الأوائل من أجل الحصول عليه..

غادر «بلال» القسم وطار نحو مصلحة الأحوال المدنية بالزيتون واتجه مباشرة نحو مكتب الأستاذ أحمد السيد فلم يجده على مكتبه.. بل ولم يجد مكتبه.. كانت الطرقات خالية تماماً من الموظفين والمواطنين والعساكر.. خواء وكأنه في خزانة بطولات نادي الزمالك.. هبط للدور الأرضي ليسأل الحارس:

- هو فين موظفين السجل المدني.. اترفدوا كلهم ولا إيه؟

- لا عقبال عندك انتقلوا الأميرية.

- عقبال عندي.. انتقلوا!!!! وفيين الأميرية دي؟

- في الأميرية.. حد معرفش الأميرية؟

أخذ «بلال» يسأل ويأخذ الوصفات للطريق من كل المارة حتى نجح -بمعجزة إلهية- من الوصول للمبنى الجديد للأحوال المدنية.. سأل عن الشئون القانونية وسره أن رأى وجه الأستاذ أحمد السيد فانطلق نحوه كطفل يجري نحو والدته بعد انتهاء اليوم الدراسي.. في حين أن الموظف المذكور لم يبد عليه أنه يذكر موضوعه أو يذكره من الأساس.. إلا أن بضع كلمات نجحت في إنعاش ذاكرته سريعاً:

- ها.. خلصت التحريات؟

- الحمد لله.. آدي ورقة رسمية مختومة بختم حضرة النسر شخصيا وبتقول إن مفيش حد اسمه جلال.

- عظيم.. هايل.. هاتنزل نجيب نموذج ٧٤ وتكتب الطلب وتحط الدمغة وترفق كل الأوراق الخاصة بالقضية.. وتجي لي على طول.

ظل «بلال» يسعى بين صفا الدور الخامس ومروءة الدور الأرضي سبعة عشر شوطا بحثا عن الاستمارة تارة وعن الموظف الذي ذهب للوضوء لصلاة الظهر قبل الصلاة بساعتين تارة، وعن العاملة التي تحتكر بيع طوابع الدمغة بالمصلحة رغم قانون منع الاحتكار، والبحث عن فكة، والبحث عن عامل الخزانة الذي ذهب لتناول الإفطار على عربة الفول المتاخمة للمصلحة.. في كل هذه المراحل تذكر «بلال» فيلم «الإرهاب والكباب» وأشار لنفسه أنه لا يوجد إرهاب أكثر من التسبب في المصالح الحكومية.. وأتبع هذا التفكير بالدعاء للدولة ونظامها القائم بكل الخير لحرصهم على التأكد من خدمة المواطنين خدمة متميزة وهي خدمة «التكفير عن الذنوب»، التي قد يتم اختصارها أحيانا إلى خدمة «التكفير» فقط من فرط الروتين والإهمال واللامبالاة.. ولأن لكل شيء نهاية فقد أنهى «بلال» الإجراءات أخيرا بعد عدة مداولات ومناقشات جدلية كانت أهمها مع موظفة بيع الاستثمارات والتي كان لديها مشكلة عقائدية مع فيثاغورس، حيث يؤمن فيثاغورس أن $2 + 2 = 4$ في حين تؤمن الموظفة أنه إذا كان ثمن الاستمارة ٢ جنيه فثمن الاستثمارين هو خمسة جنيهات.. وبرهنت على ذلك بالدليل الفعلي إذ امتنعت عن

رد الجنينه الخامس لبلال لتثبت نظريتها بشكل علمي ممنهج..
ففي حين يمكن إثبات النظريات العلمية بالمقارنة أو بالمنطق
أو بالاستدلال أو بالاستبعاد أو بالاستنباط.. اتبعت الموظفة
منهجاً جديداً في إثبات نظريتها وهو الإثبات بالاستبعاد.

المهم حين عاد «بلال» للأستاذ أحمد السيد كان يتصبب
غضباً وعرقاً وإحباطاً.. فما كان من الأستاذ أحمد إلا أنه رثى
لحالته ودعاه للجلوس بل وطلب له شايًا كي يهدئه قليلاً،
ثم أخذ منه الأوراق كافة ودعاه للحضور للمصلحة بعد
أربعة أيام في تمام الساعة صباحاً للذهاب إلى لجنة الأحوال
المدنية في محكمة زينهم.

عاد «بلال» لبيته منهكاً مرهقاً خائراً القوى محطماً
الأعصاب ليجد مطروفاً أصفر كئيب اللون والمنظر ينتظره
على السفرة.. أمسكه «بلال» بحذر بين السبابة والإبهام
وكانه يمسك فأراً من ذيله وهو يسأل والدته:

- إيه دا يا ماما؟

- مش عارفة.. دا جواب جالك الصبح.

- ربنا يستر.

فض «بلال» المظروف ليجد أسوأ كوابيسه يتحقق أمامه..
فهناك وداخل المظروف كان يقبع استدعاء للتجنيد.

- تخيل يا «عادل».. أنا.. بعد دا كله يجي لي استدعاء
للجيش.. أقول لهم أنا وحيد.. يقولوا لي لأ فيه «جلال»..
أقول لهم مفيش «جلال».. يقولوا لي لأ فيه.. أقول لهم طب
خدوه هو.. يقولوا لي ما إحنا مش عارفين نجيبه هاته أنت
واحنا ندخله مكانك.. أقولهم وأجيبه إزاي وهو مش موجود

أصلا.. يقولوا لي خلاص تدخل إنت الجيش لحد ما يظهر..
أدخل الجيش إزاي وأنا وحيد.. يقولوا لي مالناش فيه الورق
بيقول إن لك أخ.. توأم.. «جلال».. الله يحرق «جلال» وسنين
«جلال».

- كده يا معلم دا فيلم عبود على الحدود.. وهاتروح
الصاعقة وتقابل عادة عادل.. أمانة تبقى تسلم لي عليها
والنبي يا «بلال».

- يا عم أنا ناقصك.. شوف لي حل.

- الحل بكرة بقى مع اللجنة إن شاء الله تنصفك.

اتجه «بلال» إلى مقر المصلحة في الأميرية في تمام السابعة
صباحا متوقعا أن يتأخر الأستاذ أحمد عن مواعده.. فلا
يوجد في القاهرة الكبرى كلها موظف يبدأ عمله في السابعة..
إلا أن ظنه قد خاب حين وجد الأستاذ أحمد يخرج من باب
المصلحة حاملا عددا كبيرا من الملفات ودلف إلى سيارة
«بلال» واضعا الملفات على الكنبه الخلفية.

- صباح الخير يا أستاذ أحمد.. دا إيه الملفات دي كلها؟

- مشاكل.. ناس ليها مشاكل زي حضرتك كده.

- استعنا على الشقاء بالله.

اتجه «بلال» إلى منطقة زينهم وأخذ الأستاذ أحمد الملفات
واتجه إلى المحكمة وغاب نحو ساعة من الزمن أو يزيد ثم
عاد حاملا نفس الملفات وعلى وجهه ابتسامة رضا.

- خير يا أستاذ أحمد.. طمني.

- خير إن شاء الله.. اطلع على الأميرية بقى.

عاد «بلال» إلى الأميرية والأستاذ أحمد منهنك في عدة
أحاديث تليفونية فلم تسنح له الفرصة ليسأله عما تم..
حين وصلا إلى مقر المصلحة اتبعه «بلال» إلى مكتبه فأخرج
له الأستاذ أحمد ملف قضيته.

- مبروك يا أستاذ «بلال».. القاضي وافق ودا قرار موجه
للأحوال المدنية بإلغاء «جلال» من الكمبيوتر.

نظر «بلال» إلى الورقة ذاهلا غير مصدق لانهاء هذا
الكابوس الذي جثم على أنفاسه طوال الفترة الماضية.
- يعني كده....

- كده خلاص حضرتك تطلع على السجل المدني هايشيلوا
الاسم وتستلم قيد العائلة مفيهوش جلال.

- ربنا يخليك يا أستاذ أحمد ويكرمك.. طيب أي خدمة
مني.. مش عايز أي حاجة؟

- سلامتك يا أستاذ.. أنا معملتش غير شغلي.

- يااااه يا استاذ أحمد.. لو كل الناس تبقي زيك..
وخصوصا مدام عفاف.

- مين مدام عفاف؟

- لا متاخدش في بالك.. أنا هافضل أدعي لك على الي
انت عملته معايا دا.

بالفعل توجه «بلال» بقرار القاضي نحو مصلحة الأحوال
المدنية بالعباسية ولوّح به لمدير الشئون القانونية الذي أسقط
في يده وظهرت عليه خيبة الأمل الشديدة بحل مشكلة أحد
المواطنين وقال في يأس:

- أنا -للأسف- مضطر أحترم أحكام القضاء.. مع إني مش مقتنع.. ولا مصدق.. بس أعمل إيه؟
- حضرتك تنفذ الحكم وتشيل «جلال» من الكمبيوتر.
- للأسف مش من عندي.
- أمال عند مين؟
- إنت لسه ما حفظتش؟ عند مدام عفاف.
- اتجه «بلال» لمدام عفاف مشفوعا بتعليمات المدير والحكم القضائي، فتسلمت منه الحكم القضائي ثم قالت:
- أنا هأعمل لك الإجراءات.. بس اللي معاها الباسوورد بتاعت الكمبيوتر هي مدام منى.
- وهي فين مدام منى؟
- مش اتحرقت! حلة الشورية وقعت على رجلها واتحرقت بعيد عنك.. وواحدة أجازة مرضي.. تعالي لها بعد ثلاث أسابيع.
- نعم ياختي.. ثلاث أسابيع.. وفين القائم بالعمل؟
- مفيش.
- طيب كلميها خدي منها الباسوورد.
- مينفعش تتقال في التليفون.. حد كده ولا كده يسمعها وييوظ الدنيا.
- أيوة صح.. قال يعني هي مش بايظة.. يعني مصالح الناس تتعطل عشان أم رجل مسلوخة.
- دول ثلاث أسابيع بس ميحراش حاجة.
- يا عالم إيه البرود دا.. ثلاث أسابيع دول ممكن يفرقوا في

مستقبل واحد.. وانتم على قلبكم مراوح؟
- اصبر يا أستاذ الدنيا مطارتش.. وبعدين الست عيانة
مش بتدلّع.

- طيب إيه رأيك نروح لها البيت وناخد معانا تورتة
وبأربعتاشر جنيه كيناكومب ونجيب منها الباسوورد ونرجع؟
- برضه مينفعش.

صاح «بلال» في ثورة عارمة:

- طيب بصي.. هاتي الورق.. مش عايز أشيل الاسم..
أنا هاشتكيكم في النيابة الإدارية ورئاسة الوزراء والقضاء
والإعلام.. أنا مش هاسكت وهاورىكم كلكم.

تجمع حوله الموظفون يحاولون تهدئته:

- مالك بس يا أستاذ متعصب ليه؟

حكى لهم «بلال» الموضوع من أوله لآخره.

- وبتقول لي أستاذنى ثلاث أسابيع وآخر يوم للوظيفة بكرة
والموافقات كلها جاهزة.. مش فاضل غير إن حد يفتح
الكمبيوتر ويلغي الزفت «جلال».. وخلاص.

قال أحد الموظفين:

- متخلصيها له يا مدام عفاف ميحراش حاجة.

- معلش يا مدام عفاف خليها عليكي.

قالت عفاف في تمنع:

- يا جماعة كل واحد ليه اختصاصاته.. هي مسئولة
الباسوورد..

- مسئولة الباسوورد!!

- أيوة يا أستاذ.. فيه واحدة مسئولة عن الباسوورد..
وواحدة مسئولة عن الكي بورد.. وواحدة مسئولة عن
الناوس.

- اسمه الماوس.

- ما علينا.. مقدرش أتعدى على اختصاصها.

قال الموظف الذي توسط لفعل الخير:

- معلش يا مدام عفاف لما تيجي هانبقى نفهمها وهي
مش هاتزعل ولا حاجة.

- مع إني مبجش أعمل كده.. بس أمري لله.. عشان
خاطر كم.

قامت عفاف بالجلوس أمام الشاشة واللعب على أزرار
الحاسب الآلي لعدة دقائق ثم قالت:

- مبروك يا أستاذ الموضوع خلص.

- الحمد لله.

تابعت عفاف:

- شلنا لك «بلال» خالص من السجلات.. انتهى.. من
النهاردة مفيش «بلال».

صعق بلال وصرخ:

- إيه؟ الله يخرب بيتك.. الحكم يقول تشيل «جلال» مش
«بلال».

- يوه مخدتش بالي.. معلش النظر على قدي بقى.

- طيب صلحها بسرعة.

- ما اقدرش أصلحها لازم أمر قضائي تاني بتعديل الاسم

اللي تم حذفه.. دا قانون يا أستاذ مش أي كلام.

أمسك «بلال» برقبته في عنف وغل.

- أنا هاوريك القانون هايعمل إيه.

قالت بصوت مختنق:

- اعقل يا أستاذ.. الحقوني.. هايموتني.. سييني لاوديك في داهية.

- إنتي خليتي فيا عقل.. عارفة لو قتلتك دلوقتي.. مش هاحصل حاجة.. لأنني مبقتش موجود.. وانتي كمان مش هاتبقي موجودة..

اندفع الموظفون لتخليص عفاف من يد «بلال».. ونجحوا بالفعل في استنقاذها من بين يديه قبل أن يقضي عليها، فيما لم ينجح «بلال» في التخلص من «جلال» حتى هذه اللحظة.

امسك حرامي.. امسكه انت*

* شكر خاص للدكتور هـ/ أمال إمام لدورها المحوري في هذه القصة.

* قصة -أيضًا- حقيقية.

- كده يا فندم شحنا باقة الخمسة وسبعين جنيه.. أستأذنك في واحد وتمانين جنيه تكلفة الباقة.

- عجيب نظام شركتكم دا.. ماتسموها باقة الواحد وتمانين وتخلصوا.. هو احنا ناقصين لخبطة.. المهم الباقة تشتغل إمتى؟

- حالا.. المفروض الرسالة وصلت لحضرتك يا فندم.

- مفيش حاجة جت لي.

- اتأكد حضرتك من الموبايل.

- ما أنا واقف قدامك أهو ماسمعتش صوت الرسالة.. لو انت سمعتها قل لي.

- يمكن السكة زحمة يا فندم.. الغايب حجته معاه.. هاهاهاهاه.

- دا أنت مرح كمان.. آدي الموبايل أهو مفيش حاجة.

تحسست جيبي حيث الموطن الأصلي للموبايل وجرابه فلم أجد أيا منهما.. أخذت أتخسس جيوبي كلها كالمسوع فلم أجده أيضا.. نظرت في كل مكان في صالة انتظار العملاء بفرع شركة المحمول ولكن لم يكن للمحمول -ولا حتى جرابه- أي أثر.

- حضرتك متأكد إنه كان معاك لما دخلت؟

- أمال يعني جاي أشحن باقة الموبايل وهو مش معايا يا أذكى إخوانك.

- طب حاول تتصل بيه كده.

- أتصل بيه إزاي يا عم العبقري!
- هو حضرتك مش حافظ الرقم؟
- لأ حافظه.. بس فين الموبايل الي هاتكلم منه.. ولا أكلمه
بالتخاطر؟
- والله لو حضرتك مشترك في خدمة التخاطر ممكن
تستخدمها.
- لا انت مرح وأهبل كمان.
- ليه يا فندم الغلط دا بس.. دا جزائي إني بحاول أساعد
حضرتك.
- أنا متأكد إنه كان معايا لأنني جالي مكاملة أول ما جيت
و....

هنا تذكرت في فلاش باك كما يحدث في السينما..
- أنا حظيت الموبايل جنبي على الكنبه وأنا منتظر دوري..
ولما جه دوري الظاهر إني سييته وجيت على الشباك.
ذهبت لمكان الانتظار حيث كنت أجلس ولكن طبعاً
الموبايل كان قد تبخر.
- معلىش يا فندم بقى عوضك على الله.
- عوضى على الله إيه يابني هو أنا وقع مني خمسة جنيه في
سوبر ماركت.. دا موبايل.
- الموبايل حضرتك سبته وحد تاني أخده.. خلاص هانعمل
ايه يعني.. سلم أمرك لله.. قدر الله وما شاء فعل.
- دا ايه قوة الإيمان الي نزلت عليك دي.. أنا معجب
بصبرك على الابتلاء دا.

- حضرتك لو فكرت تجيب موبايل غيره عندنا عرض ممتاز على تليفون جديد بكاميرا.

- عروض.. أيوة عندك حق انا فعلا كنت بافكر في....

جاءتني فكرة فصرخت فيه فجأة:

- فين كاميرات المراقبة؟!

- موجودة يا فندم.

- افتح لي الكاميرات نشوف مين اللي سرق التليفون.

- يا فندم ماقدرش أفتح لحضرتك الكاميرات.

- ليه الكاميرات قاعدة من غير إسدال؟

- لا يا فندم.. بس كلمة السر بتاعت البرنامج مش معايا.

- آمال مع مين؟

- مع مدير الفرع ومش موجود دلوقتي.

تقمصت شخصية عبده المجنون وأخذت أصرخ بأعلى صوت وانا أعلم تماما أن هذه الطريقة ستؤتي ثمارها:

- أنا مش ماشي من هنا ومفيش عميل هايدخل على

الشباك دا غير لما الكاميرات تفتتح.. هاقول لكل العملاء

دول إني اتسرقت هنا وانكم متواطئين ومش عايزين تفتحوا

الكاميرات ومتسترين على الحرامي ومسرحين حرامية في

الفرع تسرق العملاء وهافضحكم على فيسبوك و....

كما توقعت تكهرب الجو وتوتر الحاضرون ووجدت أحد

الموظفين يبدو أنه أكبر رتبة من موظف الشباك يقترب مني

ويسأل:

- خير بس يا فندم حضرتك بتزعق ليه؟

قصصت عليه الموضوع باختصار وكان أكثر تفهما للموقف فدعاني لمكتبه وعرض أن يتصل بمدير الفرع لأخذ كلمة السر منه وفتح البرنامج والاطلاع على الكاميرات على مسئوليته الشخصية فقط ليؤكد على تعاون فرع الشركة مع العميل.. ووعد أن يتم ذلك في سرعة البرق.. وقد كان.. وفي خلال أقل من خمسة وأربعين دقيقة من الاتصالات والشرح للسيد مدير الفرع تم الحصول على كلمة السر منه وفتح البرنامج - كانت هذه هي المرة الأولى التي أتعرف فيها على سرعة البرق المصري «خمس وأربعين دقيقة» والتي يبدو أنها تربط بسرعة باقات الأنترنت في مصر - وكما يحدث في السينما بالضبط أخذنا نقدم ونؤخر في شريط التسجيلات حتى وصلنا للحظة الفارقة التي دخلت فيها إلى الفرع، ووضعت المحمول بجواري على الكنبه في منطقة الانتظار.. ثم.. ثم جاء الجاني وجلس بجواري.. تذكرته وقتها لأنه لا يمكن نسيانه.. رجل يبدو على ملامحه وملابسه أنه غريب عن البلد.. طويل القامة إلى حد لا يمكن تجاهله وكانت معه زوجته.. جاء وجلسا بجواري وأذكر أنني حاولت تسلية نفسي أثناء الانتظار بتخمين جنسيته من ملابسه ولهجته.. قمت - على شريط المراقبة - واختفيت من الكادر وهنا لاحظ الرجل وجود المحمول أخذ يختلس النظر إليه كعاشق ينظر لمحبوبته.. كان يتسم للموبايل عملا بمبدأ «نظرة فابتسامة».. ثم مديده نحوه بتردد كعاشق ينوي اختلاس مسكة اليد الأولى.. كان في نظره فعلا شغف وعشق للموبايل، وبالنظر لوجه زوجته أدركت أنه يفتقد الكثير من المشاعر التي صارت «تلدق منه» نحو أي شيء حتى لو كان جهاز محمول

مسكين.. وفجأة، وفي لحظة واحدة انتقل المحمول إلى مشواه الحالي في جيبه.. والأكثر بجاجة أنه لم يغادر الفرع وإنما انتظر واتجه لشباك خدمة العملاء بعدها لينهي ما جاء من أجله ثم انصرف قبلي بكل هدوء وطمأنينة.. طبعاً في هذه الأثناء حاولنا الاتصال بالتليفون عشرات المرات لنجد أنه مغلق أو غير متاح كما تقول السيدة اللطيفة صاحبة الرسالة المسجلة.. توجهت مع الموظف المتعاون إلى مسئول خدمة العملاء الذي تعامل مع اللص لنسأل عن نوع الخدمة التي قام بها.. ليتبين لنا أنه كان يريد شراء خط لكن لم تتم الخدمة لأن الرجل ليس لديه إقامة رسمية في مصر.. وهنا انقطع الخيط الذي كان يمكن أن يقودني إليه.. شكرت الموظف المتعاون وخرجت من الفرع لا ألوي على شيء*.. حتى تبادرت إلى ذهني فكرة.. هناك مركز تسوق كبير لبيع وتصليح التليفونات المحمولة بالقرب من فرع شركة الاتصالات، وحيث إن الموبايل مغلق بكلمة سر فلا بد أنه سيذهب لأحد المحلات في المول لفك شفرته أو لبيعه أساساً.. هذا هو التفكير المنطقي.. اتجهت من فوري نحو المركز الضخم وأخذت أجول فيه محلاً محلاً وطريقة طريقة وزنجة زنجة.. وكلما رأيت أحداً يشبه الرجل إياه دخلت إلى المحل وتفحصته بنظري كمخبر سري مفضوح الأمر لأكتشف أنه ليس اللص المنشود فأخرج من المحل متظاهراً بأنني قد نسيت شيئاً ما بالخارج.. تمثيلية مفضوحة جداً ولكن لا يهم.. استغرقت جولتي حوالي ثلاث ساعات

* لا أعرف بالضبط معنى هذه الجملة.. ولا أعرف أصلاً كيف «يلوي» أحدهم على شيء.

حتى أنهكت تماما وبالطبع لم أعثر للرجل على أي أثر.

عدت إلى داري بخفي حنين ولكن بدون المحمول، وأنا أفكر في كل ما كان على المحمول من بيانات وتليفونات وجهات اتصال خاصة بالعمل وأشياء لا يمكن استرجاعها مرة أخرى.. حكيت الموضوع لزوجتي التي حاولت -على مائدة السحور حيث كنا في أوائل أيام شهر رمضان- أن تهون عليّ الواقعة وتقترح حلولاً لاسترجاع ما راح من بيانات، لم أكن في حالة تسمح لي بالتفكير فيما قالت ولم أجد في نفسي حتى الرغبة في الأكل فلم أبتلع غير لقيحات من الفول وثلاث بيضات مسلوقات وبعض الجبن الأبيض كل هذا مغمساً بأربعة أرغفة بلدي كبيرة.. ولم أشرب الشاي فقد أصابني فقدان الموبايل بسدّة نفس حقيقية.

في اليوم التالي توجهت إلى قسم الشرطة لتحرير محضر بالواقعة؛ إذ يمكن بعدها متابعة التليفون والاستدلال على من سرقه بعد أن يضع فيه شريحة أخرى كما يقول المنطق ومراجع قسم الاتصالات بكلية الهندسة، دخلت إلى القسم وتوجهت إلى أحد أمناء الشرطة المتواجدين في منطقة الاستقبال بالقسم والجالس مباشرة تحت لافتة «الشرطة والشعب في خدمة الوطن» فسألته أولاً أين ذهب شعار «الشرطة في خدمة الشعب» فنظر لي نظرة فحواها: «أقول لك فين وماتزعلش».. فنفضت عن رأسي تلك الفكرة فليذهب الشعار إلى الجحيم أو إلى مارينا لا يهم.. قصصت عليه الموضوع فنظر لي نظرة ساخرة أخرى مفادها «لن تصل إلى أي شيء يا برنس»، هذا الرجل خبير في لغة العيون.. فنظرت

له نظرة استعطف أن يحرر لي محضرا بالواقعة، فقال أخيرا..
ياه لقد شككت أنه يتكلم أساسا:

- من عنيا يا بيه.. سيادتك بس هاتجيب لنا ١٠ ورقات
فلوسكاب وقلم فرنساوي وورقتين كربون من المكتبة اللي
جنب القسم.

- وداليه بقى ان شاء الله.. هو كمان القسم بقى فيه سبلايز؟

- عشان أكتب لك المحضر.. مفيش قلم.. هاتكتب بصباغي!
ومفيش ورق وماكينه التصوير عطلانة عشان كده طلبنا ورق
كاربون.. اتفضل يا مواطن ماتعطلناش.

قال كلمة «مواطن» كأنها سبة لكني لم أبال وذهبت
لشراء ما طلبه وعدت للقسم فقام مشكورا بتحرير المحضر
وأعطاني رقمه، فسألته عما يلي ذلك من خطوات.
- المحضر هايتحول للنيابة.

- حلو.

- وكيل النيابة هايقدم طلب للنائب العام بمراقبة التليفون.

- النائب العام شخصيا؟ جميل.

- سيادة النائب العام هاياشر عليه بالحفظ.

- حفظ ليه بقى؟

- هو النائب العام هايفضى للبلاوي المتلتلة اللي في البلد ولا
للسامسونج بتاعك؟

- يعني المحضر دا كده ملوش أي لازمة.

- هاقول لك.. بس الأول عايز أسأل حضرتك سؤال.

- اتفضل.

تحسس رأساً صحراويا خاليا تماما من الشعر وقال:

- حضرتك شكلك متعلم وبتفهم في حوارات المحمول..
أنا سمعت إن في أبليكيشن يرجع الشعر تاني باستخدام
الذبذبات.. صحيح الكلام دا؟

- آه.. بس لو كان شعرك دهني هاتحتاج تسأسأ زيت نباتي
أو سمّنة بلدي على راسك قبل ما تشغل الأليكيشن.
سأله أمين الشرطة بجدية:

- والزيت دا مايوظش الموبايل؟

- لو كان موبايلك فنلندي تستخدم معاه سمّنة هولندي
مش هايوظ.

- لا دا أنا موبايلي صيني.. أحط زيت ايه بقى؟

- حط أي هباب ان شالله تحط جنبه برايملي.. هو أنا ناقص
مشاكلك وقرعتك.. خلصني.. المحضر الي عملناه دا آخرته
إيه؟

قال بتشفٍ:

- صفيحة الزبالة في النيابة.. وابقى قابلني لو الموبايل رجع.

- هايرجع.. شعرك هو الي مش هايرجع يا بتاع الذبذبات.

تركته وتوجهت إلى مكتب ضابط المباحث وانتظرت حتى
انتهى من شرب قهوته وسباب أم الجندي الغلبان الذي قام
بعمل القهوة ثم التفت إليّ متسائلا.. حين قصصت عليه
الموضوع قال:

- شوف يا أفندي (الرتبة المدنية للمواطن العادية.. الي هو
مش ظابط ولا قاضي ولا رجل أعمال)، إحنا مشغولين دلوقتي

بمتابعة الخونة والعملاء على الفيسبوك والطويطر، ومعدناش وقت حتى نتابع الأطفال اللي بتتخطف والعربيات اللي بتتسرق يبقى أكيد مش فاضيين نتابع سرقات المحمول، ولا حتى باقي السرقات ولا أي بلاغ ولا حوادث ولا نيلة.. الله يحرق الثورية أعداء الوطن بتوع الفيسبوك.

- كان الله في العون يا فندم.

- ماتقوليش يا فندم أنا مابحبش الألقاب.. قل لي يا باشا على طول من غير تكليف.

- وعلى كده بقى شركة الاتصالات مظبطة باقة النت بتاعت القسم ولا زي عامة الشعب؟

- دول ولاد *****.. آخر ما زهقنا جنبنا واحد فني من الشركة ومتحفظين عليه في الحجز تحت، عشان لما النت يقطع يصلحه.

- أيوة كده هو دا الشغل الصح، وأهو أسرع من المكالمات لخدمة العملاء وبتاع.

- هانتابع الخونة على الفيس إزاي وإحنا النت عندنا مقطوع.. إحنا بنحل حلول جذرية يا أفندي.

- ربنا يقويكم ويقوي سرعة النت بتاعتك يا باشا.. بس بالنسبة للموبايل يعني مافيش أي أمل؟

- والله أبدا.. مش هاكذب عليك.. وبعدين يا أخي احمد ربنا انه اتسرق منك بهدوء كده من غير دوشة.. زي شبكة الدبوس، مش أحسن ما كان يطلع عليك حد يبتك وياخده منك بالعافية، ومين عارف جايز كنت قاومته وساعتها احتمال كبير كان يبقى معاه مطواة ولا سنجة ويغزك بيها،

لا قدر الله تنزف.. والإسعاف تتأخر عليك -عشان الدنيا زحمة- وتروح المستشفى متلاقيش سرير، وحالتك تتدهور -لأني نسيت أقولك إن المطواة كانت ملوثة- وتموت، وبرضه كان هاياخد الموبايل.. يبقى قضاء أخف من قضاء، احمد ربنا واحنا في الأيام المفترجة دي.

- والله على رأيك.. الحمد لله.. بس سؤال يا باشا؟

- اتفضل.

- هو حضرتك فكرت تكتب سيناريوهات قبل كده؟

- لأ، ليه؟

- أصل السيناريو اللي انت لسه قايله دا عبقرى، ينفع سهرة تلفزيونية.

- مواهب يا باشمهندس بس الشغل دافئها.. عموماً لو مصمم قوي يعني، ممكن تروح لشرطة الاتصالات، هم بيحبوا المواضيع اللي زي دي قوي، ودا شغلهم بصراحة مش شغلنا احنا.

شكرته على المعلومة القيمة وخرجت من مكتبه بينما كان يتناول سيرة والدته أحد المشتبه بهم بكل سوء، واتجهت فوراً إلى شرطة الاتصالات، حيث إنه من المعروف عني أنني لا أترك حقى أبداً، ومبدأي في الحياة هو: ما ضاع حق وراءه مُطالب، المهم.. في شرطة الاتصالات وجدت الضابط المسئول عن متابعة مثل هذه البلاغات في إجازة، وتكلم معي أحد أمناء الشرطة أن الطريقة الوحيدة هي استدراج اللص والتعامل معه بنفسى فالطرق الرسمية لن تؤتي أي ثمار، وستضيع الوقت والجهد، شكرته على النصيحة

وخرجت لا أدري ما العمل، فالشرطة تنصح من تُسرق سيارته بالتفاوض مع السارق، ومن يُخطف ابنه بدفع الفدية للعصابة، ومن يُسرق محموله باستدراج اللص، وقد كنت أظن أن استدراج اللصوص وإعداد الكمائن والقبض عليهم هو مهمة الشرطة، يبدو أن الشرطة احترفت دور الناصح الأمين ولعب دور يا بخت من وفق راسين.. والإنجاز الوحيد الذي حققته الشرطة مؤخرا هو المركز السادس في الدوري الممتاز.

في طريق عودتي إلى المنزل تذكرت أحد الأصدقاء الذي يعمل في جهاز أمني مهم، وبالرغم من علمي أن الشرطة تعتبر السرقات عموما ليست من اختصاصها، إلا أنني قلت لن أخسر شيئا إن استشرته فيما يجب عمله، اتصلت به وحكيت له الموضوع فأكد لي أن الأمل في عودة المحمول يقارب الأمل في عودة الجنيه إلى سابق عهده أمام الدولار، إلا أنه عرض عليّ أن يرسل معي أمين شرطة إلى فرع شركة محمول ليرى السارق على كاميرات المراقبة لعله يكون من الوجوه المألوفة أو من المسجلين لديهم وحينها تصبح متابعته أمرا سهلا، اتفقنا على القيام بهذه الخطوة في اليوم التالي لترتيب الأمر، اكتفيت بهذا القدر من التعامل مع الشرطة في ذلك اليوم وتوجهت إلى المنزل للاستراحة قليلا قبل الإفطار.

في اليوم التالي صحوت مبكرا وارتديت ملابس تليق بمقام السيد أمين الشرطة الذي سوف أقابله.. فالرجل قد يمسك طرف الخيط الذي نلفه حول رقبة السارق.. اتجهت للقسم وقابلت أمين الشرطة وتوجهت بصحبته إلى مقر فرع

الشركة واتجهت لموظف خدمة العملاء الذي كان يتابع معي الأمر.

- صباح الخير، أنا صاحب المحمول الي اتسرق هنا في الفرع.

- أهلا صباح النور يا فندم فاكر حضرتك طبعاً، يا ترى لقيت محمول، ولا هاتستفيد معانا بالعرض بتاعنا على التليفون أبو كاميرا؟
- لا أنا عايزك تفتح الكاميرا تاني للأستاذ.

- مين دا؟

- اتكلم كويس الباشا أمين شرطة من القسم جاي يشوف شريط كاميرات المراقبة عشان ممكن يتعرف على الجرامي.
- أيوة بس حضرتك عارف إن كلمة السر مش معايا، مع مدير الفرع.

- وهو فين مدير الفرع؟

- مش موجود حضرتك.

- هو المدير دا ماييجيش هنا أبدا؟

- لا، ببيجي بس هو دلوقتي مش هنا.

- طيب ماتكلمه تاخد منه كلمة السر زي ما عملنا يوم السرقة.

- لا حضرتك مش هاقدر، أنا عملتها ل حضرتك استثناء يوم السرقة إنما طالما البوليس دخل في الموضوع يبقى لازم طلب رسمي من المأمور لمدير الفرع.

- الي هو مش موجود.

- بالظبط كده.

- أنا هاقدم فيكم شكوى بدعوى عدم التعاون.

- أنا تحت أمرك يا فندم، وحضرتك لو حابب أنا ممكن أعملك خصم خاص على تليفون 3G بكاميرتين.

- لو مكتتش صايم كنت رديت عليك.

كل هذا وأمين الشرطة يتابع الحوار بشغف من يتابع مباراة مصارعة بتعليق ممدوح فرج، المهم باءت هذه المحاولة بالفشل وقمت بإعادة الأمين إلى القسم ثم اتصلت بخدمة العملاء لعمل شكوى ضد مدير الفرع وموظف خدمة العملاء، استغرقت المكالمات حوالي نصف ساعة من الانتظار على الخط وعدم فهم الموظفة لفحوى الشكوى ثم التحدث مع مديرها، وفي النهاية تم وعدي بحل المشكلة ومعاودة الاتصال بي.

بعد الإفطار كنت على المقهى مع أحد الأصدقاء وقصصت عليه الموضوع فقال محتدا:

- إزاي متقوليش الموضوع دا من ساعة ما حصل.

- وأنت إيه علاقتك بالقصة دي، أنت تعرف حرامي من هواة جمع التليفونات الجديدة؟

- لا، يا خفيف، أعرف حد شغال في شركة المحمول، نديله الرقم بتاع المحمول وماركتة وهو يتابعه وأول ما يشتغل على شريحة جديدة يقول لنا.

- بجد.. طيب كلمه الله يكرمك بس يا رب يوافق.

- هايفارق إن شاء الله سيب لي انت الموضوع دا وحاسب لي

على السحلب وانا هاظبط لك الأداء.

شكرت صديقي على هذه الخدمة الغالية التي لم أكن سأتمكن من عملها لولاه وأعطيته بيانات التليفون وطلبنا سحورا على القهوة، وطبعاً قمت أنا بدفع حساب السحور باعتبار الخدمة المستقبلية، وقد كان.. فبعد ثلاثة أيام وجدت صديقي يتصل بي ويمليني رقم محمول وعنوانا، فهمت منه أنها خاصان بالشريحة التي تم تركيبها في تليفوني حديثا غالبا بواسطة اللص أو من اشتراه منه، شكرته بشدة حيث إنه قد أعاد لي الأمل مرة أخرى وأصبح لدي خيط يمكن أن يقودني إلى اللص، توجهت بالورقة المدون عليها البيانات إلى قسم الشرطة وقابلت الضابط إياه الذي تذكّرني ورحب بي في فتور فبادرته:

- بص يا باشا.. أنا قدرت أجيب رقم تليفون وعنوان الحرامي اللي سرق مني التليفون.

فقال باهتمام شديد وهو يسلك أذنه بمفتاح معدني:

- طيب برافو عليك والله.. تحياتي.. يلا كلمه وربنا يوفقك معاه.

- أكلمه.. أنا؟!

- آه أنت.. إيه مش معاك رصيد؟

- لا مستورة الحمد لله.. بس يعني حضراتكم كشرطة مش هايكون لكم أي دور؟

- بص يا حبيبي.. ثبته أنت بس في أي مُكَنَة وقل لنا وإحنا نعمل اللازم.

خرجت من القسم وقد تأكد لدي يقين (لن يعيد لي تليفوني أحد غيري، وما ضاع حق وراه مطالب) فكرت كثيرا في خطة لاستدراج السارق مستعينا بتراث طويل من قصص أجاثا كريستي والمغامرون الخمسة وأدهم صبري، وعلى رائحة القهوة قمت بإعداد خطتي بكل إحكام ووضعت الخطة البديلة كما يحتم علم التخطيط البوليسي. وكانت أول خطوة في هذه الخطة هي التأكد من الرقم الذي أعطانيه صديقي، فاتصلت به من تليفون أحد الاكشاك ليرد عليّ شخص بلهجة غير مصرية لتأكد بنسبة كبيرة أنه هو.

الخطوة الثانية كانت التوجه نحو العنوان الذي ذكره صديقي، تحت البناية وقفت أتابع لوحة الاتصال الداخلي (الانتركم) التي يكتب عليها أسماء كل السكان لأجد اسم اللص الذي حصلت عليه من شركة الاتصالات مكتوبا أمام خانة الدور الثالث.. دق قلبي بشدة حيث إنني أصبحت على بعد خطوات قليلة من هدفي، كما أنني أثبتت لنفسي أنني ضابط مباحث كفء ضل طريقه إلى كلية الطب، وأن عدم اختياري لكلية الشرطة فيما بعد كان من سوء حظ جهاز البوليس، لم أستطع دخول البناية لأن بابها مغلق ولا يفتح إلا بواسطة أحد السكان.. دقت جرس الاتصال الداخلي لشقة اللص كثيرا ولكن أحدا لم يرد.. انتظرت برهة حتى فتح أحد السكان باب البناية فدخلت إليها مسرعا وتوجهت للطابق الثالث، وهنا انهارت أحلامي كلها، فمنظر الباب من الخارج يوحي بأن الشقة مهجورة

منذ فترة، دققت الجرس على أمل أن يفتح لي أحدهم وهنا سأتظاهر بأنني أحد الباعة الصينيين الذين يجوبون منازل المصريين لبيعهم بضائع رخيصة الثمن والجودة.. صحيح أنني لم يكن معي أي بضاعة، ولم يكن معي حتى حقيبة أدعي أن بها بضائع، دعك من أن شكلي ليس صينيا على الإطلاق.. إلا أن هذا لم يشغل بالي ساعتها، المهم أنني دققت الباب كثيرا وطويلا حتى فتح الباب، لم يكن هو نفس الباب الذي أدق عليه وإنما باب أحد الجيران يسألني عن أريد، فكرت للحظة أن ألعب دور البائع الصيني ولكن نظرة إلى البنيان القوي للرجل الذي فتح الباب جعلتني أعدل عن ذلك.. فذكرت اسم السارق وقلت أنني أريده لأمر هام.. ليعلمني الجار أن السارق قد هجر البناية منذ فترة حيث إنه لم يدفع الإيجار ولا إيصالات الكهرباء المستحقة عنها، هززت رأسي متفهما وغادرت مسرعا قبل أن يطالبني بالمبالغ المتأخرة على الرجل.. ها قد ضاع مني خيط، ولكن ما زال هناك خيوط أخرى مهمة.. أولها رقم المحمول.. وهنا كانت الخطوة الثالثة من الخطة بشراء شريحة محمول برقم جديد تماما، وبمساعدة أحد المختصين في أمور تكنولوجيا المعلومات قمنا بتسجيل الخط على مواقع إظهار رقم الطالب باسم إحدى الوكالات التي تقدم مساعدات للاجئين والفقراء.

أعطيت المحمول لزوجتي وأفهمتها دورها جيدا.. ستتكلم بإنجليزيتها الممتازة وكأنها إحدى موظفات هذه الوكالة وستقول له أنها بحاجة لبعض المعلومات حتى تستطيع أن تدرجه على كشوف المساعدات الشهرية، وقد لعبت دورها بامتياز حقيقي، واستخلصت منه كل المعلومات التي يمكن

أن تساعدنا، فعلمت أنه يدرس في إحدى الجامعات في مصر بمنحة من بلده الأصلي، ومنحها محل سكنه الجديد وكان في منطقة شعبية قريبة، ورقم جواز سفره وكل شيء، واتفقت معه زوجتي على أن يقابله أحد موظفي الوكالة -أنا- أمام محل شهير قريب من محل سكنه ليأخذ توقيعه على بعض الأوراق الرسمية ويسلمه كوبونات يأخذ بها مواد غذائية من أرز ومكرونه وجبنة رومي ومكسرات وحلويات وفوايس رمضان وترايزات بلياردو وبنج.. سال لعاب اللص ووافق على الفور، أرسلنا له رسالة على الموبايل بها عدة أرقام أفهمناها أنها الكود الخاص به في الوكالة وشددنا عليه أنه يجب أن تكون معه هذه الرسالة أثناء مقابلة مندوب الوكالة.. وذلك فقط حتى نتأكد من أنه سيجلب معه الموبايل معه. توجهت مرة أخرى إلى قسم الشرطة وأنا أكاد أطير فرحاً، وتوجهت إلى مكتب الضابط إليه هاتفاً:

- يا باشا.. يا باشا.. ثبتهولك.

نظري في عدم فهم فتابعت موضحاً:

- الحرامي يا باشا.. حرامي الموبايل.. ثبته وهاقباله كمان ساعة قدام محل (....).

- آه.. افكرتك.. بس يابني إليه المعاد دا! كمان ساعة إليه.. انت مش شايف الجو حرازي.. وكمان الأمناء كلهم روحوا.. ابقى ثبته بعد الفطار وتعالى لنا واحنا نعمل اللازم.

- بعد الفطار!

- آه.. ولو تكمل جميلك بقى يبقى بعد مسلسل الساعة ٩ عشان القسم هنا كله متابعه.

- من عنيا يا فندم.. في أي أوامر ثانية؟

شمر ساعديه خارجا من المكتب وبدا عليه أنه ذاهب ليتوضأ وقال لي:

- لا.. روح ربنا يوفقك.

- والله يا باشا أنت بقيت بتدعي لي بالتوفيق أكثر من أمي..
كتر خيرك.

لم يرد عليّ ونادى على الجندي خارج مكتبه:

- حضر لي المصلية يابن ال ***** عشان أصليّ العصر قبل ما
أروح.

خرجت مغتاظا من القسم.. فقد جاء الزمن الذي يختار فيه رجال الشرطة توقيت القبض على اللصوص.. شيء جميل.. عموما أنا كنت مستعدا لهذا أيضا.. فكان معي بعض الأوراق التي تشبه الأوراق الرسمية وذهبت بالفعل لمقابلة اللص وقد نويت إن أخرج المحمول أن «أنتشه» من يده وأجري مبتعدا وقد ظفرت بموبايلي. خطة مناسبة تعتمد على سرعتي في الركض وأنا أؤكد أنني لست أوصف بالبطء.. وقفت في المكان والموعد المحدد وجاء اللص.. عرفته من هيئته.. نفس القامة الفارعة والسحنة التي توحى أنه ليس من أهل البلد.. تبادلنا بعض الكلمات وأعطاني نسخة من جواز سفره، طلبت الاطلاع على الرسالة التي أرسلت إلى تليفونه.. مديده في جيبه أما أنا فقد اتخذت وضع الاستعداد للركض، وهوب.. أخرج من جيبه تليفونا محمولا قديما للغاية يبدو أن خفرع شخصا كان يستخدمه

لمتابعة بناء الهرم.. ليس هذا هو تليفوني بالطبع سألته إن كان هذا هو التليفون الوحيد الذي يملكه.. طبعاً استغرب سؤالي فقلت بارتباك أن لدينا رسائل مالتى ميديا خاصة بطريقة استخدام كوبونات المواد الغذائية ويلزمها تليفون آخر حديث فقال لي أن لديه واحدا بالفعل لكنه لا يستخدمه باستمرار.. اتفقنا على لقاء آخر في نفس اليوم «بعد الإفطار» وبعد مسلسل التاسعة مساء يكون معه فيه التليفون الآخر لأريه كيف يتعامل مع الكوبونات.

في الموعد المحدد ذهبت مرة أخرى لنفس المكان وأخرج المحمول فخفق قلبي بشدة.. هو.. تليفوني الحبيب أخيراً وبعد طول انتظار.. كان قابعا في يد اللص.. لكن كف يده الكبير مثل خف الجمل كان يحول دون خطوة «تنش» الموبايل والجري.. فهو يحيط بالمحمول من كل جوانبه.. لذا فقد قررت استغلال اطمئنانه لي لأستدرجه للقسم.. قلت له أن الكوبونات مع أحد الزملاء وسنذهب لإحضارها منه.. وأخذته في سيارتي وتوجهت به إلى القسم.. لحسن الحظ أن اللافتة على باب القسم لم تكن معلقة وذلك للتجديدات التي يجرونها في مدخل القسم، وأيضا جندي الحراسة لم يكن في مكانه.. لا بد أنه يتابع المسلسل.. قدته إلى إحدى الغرف في ساحة القسم وطلبت منه الانتظار ريثما أقابل زميلي وأرجع.. وطرت إلى مكتب الضابط:

- يا باشا.. يا باشا..

- إنت تاني!

- دا أنا عايز أشكرك.. ربنا استجاب دعواتك ووفقني

وجبت لك الحرامي لحد هنا.

- هنا فين؟

- هنا في القسم.

- أنت بتهرج.. دا مكان تجيب فيه حرامي؟

- إيه يا باشا هو احنا في الأوبرا.. مش دا القسم والحرامية بيتقبض عليهم هنا؟

- قصر الكلام.. عايز إيه دلوقتي؟

- والله لو سعادتك تتكرم وتقبل تقبض على الحرامي يبقى كتر خيرك يا حكومة.

- أوففف.. أمري لله..

ونادي بصوت عال:

- يا منتصر.

دخل أمين شرطة للمكتب مهرولا وبيده كيس فيه بقايا عصير سوبيا.

- الأستاذ جايب لنا فضلة خيرك حرامي موبايلات.. روح اقبض عليه وارميه في الحجز.

- حاضر سيادتكم.

قدت أمين الشرطة ومعه أحد الجنود إلى الغرفة التي تركت فيها اللص فدخلوا وجندلاه في ثانية واحدة وقبضا عليه ثم اقتاداه إلى الحجز وأخذاه منه الموبايل وسلماه للضابط الذي قال لي بانتشاء:

- أدينا قبضنا عليه يا سيدي.. مبسوط كده.. على الله ما يكونش عندك طلبات تانية.

- ألف شكر يا فندم والله أنا تعبتكم معايا.. لو سيادتك بس تسلمني الموبايل يبقى كتر خيرك.

- موبايل إيه الي تستلمه؟ دا حرز.. يعني تستلمه من النيابة بكرة إن شاء الله.

- نيابة ليه بس يا باشا؟ الموبايل بتاعي والحرامي عندكم.. إديني التليفون خليني أروح الحق السحور.

- ماينفعش.. دي قضية كاملة تعبنا فيها سهر وتحريات ومتابعة.. وزى ما احنا عملنا شغلنا النيابة كمان لازم تعمل شغلها.. وكمان يعرفوا إننا شغالين كويس وبتقبض على الحرامية.

- شغلكم! يا باشا دا أنا الي جايب الحرامي لحد هنا.

- ومين الي دعى لك إن ربنا يوفقك؟! إنت نسيت؟

- يا باشا أنا صاحب التليفون.. والله العظيم التليفون دا بتاعي.. إيه بس الي ممكن يثبت لك إنه بتاعي؟

- حزن.

- نعم؟!

- آآ.. قصدي العلبة الأصلية أو فاتورة عليها السيريال نمبر بتاع التليفون.

أخرجت له الاثنتين فتفحصهما مليا ثم قال:

- خلاص أنا هاثبتهم في المحضر عشان تستلم التليفون بسهولة.. يلا بقى روح اتسحر ونام عشان عندك نيابة الصبح.

يبدو أنني ليس مكتوبا لي الخروج من القسم مجبور

الخاطر ولو لمرة واحدة.

في صباح اليوم التالي توجهت إلى دار النيابة وظللت منتظر دور القضية -آه ما هي بقت قضية- لأكثر من أربع ساعات.. هذا وأنا صاحب الحق.. وبعد طول انتظار دلفت إلى مكتب وكيل النيابة الذي سألني عدة أسئلة روتينية ثم سلمني التليفون وانصرفت شاعرا بالانتصار بعد كل هذا المجهود الطويل والتخطيط الدقيق المحكم.. فعلا.. ما ضاع حق وراءه مطالب.

بعد عدة أسابيع وجدت اتصالا من رقم مختصر رددت لأجد أنها شركة المحمول تحقق في الشكوى التي قدمتها في مدير الفرع وعدم تعاونه في فتح الكاميرات.. كنت قد نسيت هذه الشكوى تماما.

- صباح الخير.. أنا عفاف من خدمة العملاء.. حضرتك كنت قدمت شكوى بخصوص كاميرا أو حاجة كده؟
- أو حاجة كده!! آه حصل وقدمت شكوى.

- احنا حققنا في الشكوى ويسعدنا نقول لحضرتك إن الكاميرا في الموبايل اللي عايز تشتره ٥ ميجا بيكسل مش ٣، وعشان حضرتك عميل مميز عندنا هانعمل لك خصم ٢ ميجا بيكسل لو اشتريت التليفون النهاردة.

- دا كده بعد ما حققوا في الشكوى! وأنا عميل مميز.

- طبعا يا فندم.

- .%\$#@##/:%\$#@##@#/.& -

- سعادة بخدمة حضرتك يا فندم وشكرا لاستخدامك شبكة (.....).

لما كان هذا كتابي الأول بعد رحيل أستاذنا الدكتور/ أحمد خالد توفيق.. فقد رأيت إعادة نشر هذه القصة التي نشرت سابقا بناء على موافقته الكريمة لتكون أحد الشواهد العديدة على تواضع رجل بقامة د. أحمد خالد وتشجيعه المستمر للشباب.

القصة موجهة بالأساس لقراء د. أحمد خالد توفيق وخاصة سلسلة «ما وراء الطبيعة» وبطلها رفعت إسماعيل.
صحيح أن هذه القصة تخلو من مدام عفاف.. لكن أتمنى ألا تخلو من الابتسامة.

أسطورة الفتوة «أسطورة الشبشب»

شكر خاص للدكتور أحمد خالد توفيق الذي سمح
بنشر هذه القصة واستخدام الغلبان رفعت إسماعيل في هذه
الأسطورة التي بهدئته معانا كثيرا.
ندعو له بالرحمة والغفران.

مقدمة

أنا الدكتور (رفعت إسماعيل) أستاذ أمراض الدم المتقاعد الذي واجه أشباح الأرض كلها وصاحب الرقم القياسي في هدم الأساطير، ما زلت أحياء.. نعم.. حتى هذه اللحظة على الأقل متحديا جزم الأطباء بحتمية وفاتي منذ عشرة أعوام.. سذج هم هؤلاء الأطباء.. ماذا؟ أنا أيضا طبيب.. يحسبون أن هذا يعفيهم من الوصف بالسذاجة!

ماذا أحكي لكم اليوم.. كانت لي مغامرة في عام..... لا أتذكر العام.. اعذروني إنها الذاكرة، ولكن ما علينا من تاريخها المهم أحداث المغامرة، كانت تدور في إحدى البلدان الأوروبية ربما النمسا أو بنما أو ألمانيا.. لست متأكدا بالضبط ربما تكون سويسرا أو إيطاليا أو البرازيل، ماذا.. ليست البرازيل في أوروبا... ربما كانت كذلك في وقت من الأوقات.. من يدري، إن ما نعلمه قليل جدا.. أقل مما نتخيل، هناك تساؤل شهير لـ (أرنولد شيلدون) «هل أستراليا هي أستراليا حقا.. لا أحد يدري»، ولكن دعكم من البلد الآن، أنتم تهتمون بأمور شكلية للغاية، كانت المغامرة تدور عن.. عن.. لا تنظروا لي هكذا، الحقيقة أنني لا أتذكر أي مغامرة كنت سأحكي.. أرى خيبة الأمل على وجوهكم، لا تتركوني وحدي، لقد تذكرت الآن إحدى المغامرات التي كانت في مصر ولكن.. لا لا.. لا أستطيع أن أحكي هذه المغامرة بالذات.. أرجوكم لا تضغطوا عليّ.. يا لقلبي المتعب الذي يجبكم، فليكن ولكن بشرط أن

تعدوني أن تظل هذه المغامرة سرا بيني وبينكم، لا يعلمه إلا القراء والمعجبون والجمهور المصري والعربي والعالمي فقط. الآن فقط أستطيع أن أحكي مرتاح البال عن أسطورة الفتوة.. نعم لم تخنك عيناك، لكن ليس بالضرورة أن يكون هناك فتوة في المغامرة، لقد قال (يوجين يونسكو) حين سئل عن سر تسمية مسرحيته بـ (المغنية الصلعاء) فأجاب: «ليس هنالك أية مغنية في المسرحية لا صلعاء ولا بشعر، لهذا فقد وجدت أن الاسم مناسب للغاية»! ولكن -ويا للدهشة- نعم هناك فتوة في المغامرة، كيف وأين ولماذا وحتى ولعل.. ربما.

دعكم من التساؤلات ودعوني أبدأ في الحكاية قبل أن أنسى مجددا.

«قليلون هم من يمكننا التضحية من أجلهم»

توجهت إلى مكتبي بقسم أمراض الدم بكلية طب ()
مستعدا لسماع نتائج مفاوضات عزرائيل مع مرضاي وهل
انتقلوا للعالم الآخر بعد، كان هذا حين سمعت تلك المناقشة
الحادة حول من يتولى رئاسة القسم للعام القادم، ألم أقل
لكم كم هم سذج هؤلاء الأطباء، ناديت أحد النواب
لأسأله عن أحوال المرضى:

- كيف حال الحاج (سلامة)؟

- من الحاج سلامة؟

- مريض سرير (1).

- توفي من ساعتين.

- والآنسة (منال) سرير (2)؟

- جاءها نزيف مفاجئ ماتت على أثره.

- والطفل (عصام) سرير (3)؟

- يحتضر الآن.

- وماذا تفعلون أنتم بينما يرحل كل هؤلاء؟

- أجباب في حماس: كنا نقبض الحوافز المتأخرة منذ ثلاثة
أشهر، لقد زاد مرتبي سبعين قرشا يا دكتور (رفعت).

- تبا لكم جميعا، بالمناسبة.. فلتقرأ الفاتحة لمدام (عفاف).

- من مدام (عفاف).

- مريضة سرير (4).

متى سيعرف الأطباء أن سبعين قرشا ليست مبلغا تضحي

في سبيله بحياة إنسان، طالعت إحدى المجلات الطبية ولكن
لفت نظري خبر في الجريدة عن (وصول روسيات يحترفن
الرقص الشرقي)، عجيب هذا المزاج.. رغم أنني لا أرى في
الرقص أي شيء سوى إنسان يتلوى كمريض المغص الكلوي،
إلا أنني أتساءل عن الذي يستجلب روسيات ليرقصن رقصا
شرقيا، هل تمكنت منا عقدة الخوافة إلى هذه الدرجة؟ أنا لا
أتخيل أن يسمع أحدهم إحداهن تغني بعريية ركيكة (هيببي
يا إيني.. يا مسهر إيني) ويستمتع بهذا العبث، ولكن من
قال إن الإنسان يفهم كل شيء في الدنيا؟!

جاء أحد السعاة يحمل مظروفا ويسأل عن الدكتور
(رفعت)، وأعرف أنكم لن تصدقوني ولكنني أحسست
بالحب الجارف ناحية المظروف منذ رأيته، هناك شيء ما
يجذبني إليه، له عبق إنجليزي رصين.. له سحر ورقة وجمال
(ماجي) نعم أكيد هو من (ماجي)، ولكنه تأخر كثيرا، لقد
وصلت الرسالة إلى قلبي منذ خطتها أصابعها، وقبل أن يصل
المظروف إلى مصر، وقبل أن تضع هي الرسالة في المظروف
أساسا، فضضت الخطاب لأقرأ:
«الأعز رفعت،

صدق هذا أو لا ولكنني سأمر على مصر ضمن جولة
لزياره بعض بلدان الشرق الأوسط، من أجل بحث عن...
لا أعتقد أنك تهتم بهذا، جل اهتمامك طبعاً أنني سأتي لبلدك
الحبيب المشرق -برغم أنك فيه، سأصل إلى القاهرة الثلاثاء
القادم، سأقيم بفندق () ويمكنني أن أراك صباح الأربعاء
-لو أن ليس لديك ما يشغلك، احرص على أن تظل حيا
وبخير حتى ألقاك على الأقل».

ماجي

وهل يوجد ما يستطيع أن يشغلني عنك، طيلة كل هذه
الأعوام ولم يفلح شيء في زعزعة مكانتك من قلبي، أرى مصر
الآن تستعد لوصولك، أكيد هي ستحسن استقبالك حتى
أراك.

الثلاثاء (الذي كان قادما):

وصول الرحلة رقم () قادمة من المملكة المتحدة وعلى
الركاب التوجه إلى صالة الوصول.

«قليلون هم من يمكننا التضحية من أجلهم»

الأربعاء:

لا أعرف أين (ماجى)، لقد سألت في المطار لأعرف أن
الرحلة قد وصلت وأن (ماجى) كانت على متن الرحلة،
ولكنها لم تصل إلى الفندق المذكور أبدا.. تبا لهذا، ماذا يعني
هذا، قد تكون انشغلت في أعمالها قليلا؟ ربما.. هي لم تشأ
أن تذكر طبيعة أبحاثها، لا أعتقد أن أحدهم قد تعرض لها
بسوء، ولكن..... لا أعرف شيئا، ولست متأكدا من أي
شيء، في مثل هذه الظروف سأصبر قليلا قبل إبلاغ الشرطة..
لا أحب كثيرا أن أظهر بصورة الأبله المدله في حب إنجليزية
ولم يطق بعدها عنه بضع ساعات.

الخميس:

قررت إبلاغ الشرطة فالأمر أصبح لا يمكن السكوت
عليه، لا لن أخبر (عادل) بالأمر الآن فالأمر لا يحتاج إلى

وساطة فضلا عن أنه في الإسكندرية، توجهت إلى القسم ودلفت إلى مكتب الضابط وقلت له:

- مساء الخير، أود الإبلاغ عن حالة اختطاف.

- خير.. اختطاف مرة واحدة، مين بقى اللي اتخطفت؟

- في رومانسية قلت: (ماجى).

- مين يا خويا؟

- بجدية قلت له: آآ(ماجى).. مواطنة إنجليزية وصلت يوم الثلاثاء وكان من المقرر أن تقيم بفندق () ولكنها اختفت من يومها.

- وانت تعرفها مين؟

- دي صديقة.

- صديقة.. واسمها (ماجى).. وكم إنجليزية، ومصاحبك انت بقى من وسط رجاله مصر كلها؟! ماشى ماشى، بص يا عم الحاج.. من الآخر الفندق دا مش تبع القسم بتاعنا.

- يعني إيه؟

- يعني تروح قسم (مصر الجديدة) وهم يدوروا بقى.

توجهت بسيارتي إلى مصر الجديدة وأنا أفكر عمن قد يكون اختطف (ماجى)، تبا، وهل هم (ماجى) شخصا آخر في العالم غيري أنا؟

دلفت إلى القسم وتوجهت للضابط.

- أريد الإبلاغ عن اختطاف مواطنة بريطانية.

- يادى الليلة السوداء، يا عم اهدا كده ومتقولش الكلام الكبير ده، اختطاف إيه بس؟

- يا فنديم دي كانت المفروض تنزل في فندق () ولم تظهر فيه من يوم وصولها، وفي قسم (الدقي) قالوا إن الموضوع

تبع قسم (مصر الجديدة).

- إنت قلت إيه؟ ما نزلتش في الفندق؟

- أيوة.

- تبقى مش تبعنا يا أستاذ، مسئوليتنا تبدأ منذ وصولها إلى الفندق، ما دام ماوصلتش الفندق يبقى مالناش دعوة.

- والعمل؟

- روح بقى لشرطة السياحة.. شرطة المطار.. حرس الحدود.. اشتكي في (همسة عتاب) المهم تبعد بالمصيبة دي عننا، ياللا بالسلامة.

غريب هذا ولكني لا ألومه كثيرا في الواقع، المهم توجهت إلى مختلف قطاعات الشرطة ولم أصل لحل، فالأمر ليس مسؤولية أحد.. شيء غريب.

الثلاثاء (الذي كان قادما): الحادية عشرة ليلا.

فتاة إنجليزية تخرج من المطار وتشير لسيارة أجرة قريبة.. السائق لا يبدو مريحا على الإطلاق ولكنها أعزت شعورها إلى إرهاب السفر، حمقاء.. يمكن لإرهاب السفر أن يحول لون بشرته إلى الرمادي الداكن، ومحجري عينيه إلى الأحمر، ويمكن أيضا أن يشق لسانه كلسان الحية، أما أن ينبت له ذيل أخضر فهذا هو المستحيل بعينه.

الخميس: (آخر الليل).

ظللت أمشي طوال الليل لا أدري لي وجهة، كان عقلي مرهقا من التفكير، كيف اختطفتم ولماذا أفقت من أفكاري لأجد نفسي في مكان غريب تماما لا أعرفه، كيف وصلت إلى هنا؟ هل سرت كل هذه المسافة بدون أن أدري؟

المكان عبارة عن شارع يشبه شارع الهرم مليء بالملاهي الليلية أخذت أتأمل الأنوار وما زلت في حالة شرود، ذكرياتي مع (ماجي) تتداخل مع ما أراه في شريط سينمائي صنعه (مونتير) محترف.. زيارتي الأولى لبريطانيا.. لقائي الأول بها.. كازينو نعيمة.. قارب في وسط بحيرة (لوخ نس).. قبو في قلعة إنجليزية.. شاهد الراقصة عزيزة أستك.. اختبأوا في مصر في زيارة سابقة.. كباريه جانب النجوم مغامرتنا مع الموس.. ماذا؟ كباريه (جانب النجوم) لا أعتقد أن هناك صاحب ملهى ليلي لديه الثقافة الكافية لمعرفة جانب النجوم.. حدثني حاستي السادسة أن أدخل.. آه يا أمي لو تعلمين أني سأقضي الليل في ملهى ليلي، ولكن من سيخبرها.. دلفت إلى الداخل ونظرت حولي لأصاب بخيبة أمل شديدة.. فلا يوجد شيء غير عادي.. مجرد ملهى عادي مليء بالأضواء الملونة والموسيقى الصاخبة، وصور شبه عارية هنا وهناك، إلى جانب صورة فرعونية تبدو أنها لملك ما في الأسرة الكذا عشرة.. من يهتم.. أناس سكارى يتأيلون على أنغام مغني ذي صوت أشبه بصراخ الهيتغور.. لا تنتظر قليلا.. لا توجد منضدة واحدة خالية.. نظرت طويلا حتى وجدت رجلا وحيدا فاستأذنته للجلوس معه كان غريب الأطوار.. ذا حية مما يسميها الشباب (سكسوكة) ويرتدي الشبشب ويدخن (الشيشة) والدخان يتصاعد من كل أنحاء المكان أخذت أتابع ما يحدث بنصف عين ونصف اهتمام.

- يبدو أنك لا تهتم بالعرض.. قالها ذلك الغريب ذو الشبشب.

- معك حق.. فأنا طيب ولم يكن لدي أي وقت طيلة عمري لهذا العبث.

- أنا كمان طيب..د. (توفيق إبراهيم) طيب وكاتب رعب

مكان غريب.
ظهر فجأة منذ أسبوع.
اسمه كباريه جانب النجوم.
ووجدت فيه ماجي.
وأيضاً يقدم أحسن شيشة في مصر.
- يبدو أنها ليلة سوداء بحق.

«تشرب شاي ولا تاكل فراخ مشوية؟» سألني (توفيق)
ليقدم لي واجب الضيافة، في الماضي كان الاختيار بين الشاي
والقهوة والمثلجات، لا بأس أبداً بالفراخ.
«لا تفكر أبداً أن تأخذها بالقوة».. قالها (توفيق) وهو
يصب الفراخ المشوية في الطبق.. إن المكان يعج بالأوغاد
فضلاً عن أن صاحب المكان غريب الأطوار واسمه أيضاً
غريب للغاية..
ألم تقرأ اللافتة؟ «كباريه جانب النجوم.. ملك المعلم
لوسيفر وحرمة».
- د. لوسيفر؟! -

غريب هذا.. فقد تزوج لوسيفر!. تابع توفيق:
- تخيل مرة اشتكت له إن الشيشة مكتومة قعد يقول لي
«سأغير لك الشيشة لأنني بك أسعد ولك قلبي يطرب.. غير
الشيشة يا مسعد».

- ولكن لماذا يختطفون (ماجي)، لماذا (ماجي) بالذات؟
- لن نعرف أبداً إلا إذا أصبحنا منهم.
نعم.. يجب أن نصبح منهم.

«قليلون هم من يمكننا التضحية من أجلهم»

توجهت إلى إدارة الملهى مرتديا قلنسوة صوفية وكوفية بالية ونظارة شمسية في محاولة فاشلة للتكر، لا أعتقد أنها يمكن أن تخدع عمود النور في أول الشارع، ولكن هذا هو كل ما أعرفه عن فن التكر، قابلت أحد الثيران الثلاثة.

- على فين؟

- عايز أقابل المعلم لوسيفر.

- مش موجود.. تحب تقابل النائب بتاعه؟ الأسطى شلاطة.

- شلاطة شلاطة.. ماشي.

- قاذني الثور إياه إلى مكتب مليء بصور الراقصات.

- صباح الخير يا معلم.

- رحب بي بشدة هاتفًا:

- أهو صباح.. وانتم اللي يشوفكم يشوف خير.. عايز إيه في يومك الأغبر ده؟

- والنبي يا معلم كنت طمعان في كرمك وكرم أخلاقك وكرم ضيافتك وكرم رجولتك و...

- قاطعني هاتفًا:

- وكرم مطاوع وكرم جابر.. إيه يابني شغل الشحاتين ده، اخلص وهات من الآخر.

- كنت عايزك تشوف لي أي شغلانة هنا في الكباريه.

- وانت عايز تشتغل إيه بقى.. مقشة؟

- ابتلعت الإهانة كأنها لم تكن وأردفت:

- لا يا معلم مش فيه رقاصة جديدة عندكو؟

- آه، ودي مالها ومال الشغل؟
- آآ.. مش كل رقاصة يلزمها.. احم.. فتوة؟
- هاهما بقى إنت تشتغل فتوة، دا الفتوات يزعلوا قوي
مني لو وافقت.
- طيب ما تسأل صاحبة الشأن.
- هو إنت جاي تخطبها يا فرشة البلاط إنت، وعموما
نسألها.

وصرخ بصوت هادر:
- (ماجى).. بت يا (ماجيسيسيسى).
دخلت ماجى مذعورة:
- يس مأل (معلم).
- يس.. اسمها نعم يا بت.
- نأم مأل.
- بقى الواد الخرع ده عايز يبقى الفتوة بتاعك.. قلتي إيه؟
نظرت لها في لهفة فنظرت لي بعيون خاوية:
- أوكي مأل.. نوبروليم.
نظر لها مشدوها بعد كلماتها الإنجليزية وبدأ عليه عدم
الفهم.. ثم قال:
- يعني ما رديتيش.. عموما السكوت علامة الرضا..
حظك من السما.. إنت اسمك إيه ياض؟
- محسوبك (رفعت اسماعيل).
- ياللا يا زفت.. روح وإنت فتوة.
- متشكر يا مأل.. آآآآ.. يا معلم.. ربنا يعمر بيتك ربنا ي..
- خلاص بقى ياض.. ورديتك تبدأ الليلة.. غور من وشي

بقى .

«قليلون هم من يمكننا التضحية من أجلهم»

- بسس .. ماجي .

همست بها أمام غرفتها لعلها تسمعي لكنني فوجئت بها
تندفع خارجة من الغرفة .

- الهقوني (الحقوني) .. هيلب بليز .

هبيت من مكاني .

- خير يا أسطى ماجي على سن ورمح .. فيه إيه؟

- صر صار .. بلاك .. في الأوضة .

- صر صار؟

دلفت إلى الغرفة كفارس مغوار يطارد فلول التتار وما
هي إلا لحظات وانتهى الأمر تماما ولكنني وجدت لها فرصة
سانحة للانفراد بـ (ماجي) .

- (ماجي) .. ألا تعرفيني؟

- أعرفك .. إنت الفتوة بتاعي .

- أنا (رفعت) يا ماجي .. (رفعت اسماعيل) .

- من (رفعت اسماعيل)؟

هنا أحسست بمن يتنصت من الخارج فهتفت في يأس:

- الفتوة بتاعك .. ياللا عشان نمرتك .

نظرت لي بعدم فهم، ثم هزت كتفيها واتجهت إلى المسرح ..
وانطلقت أنا أحاول أن أكتشف شخصية الجاسوس، لكنني لم
ألحق به .. أخرجت قرصا من العجوة لأضعه تحت لساني،

فلم يعد قلبي المسكين يتحمل كل هذه الإثارة.. ولم تعد ميزانيتي تتحمل ثمن النيتروجلسرين.. يجب أن أنفرد بها لكن كيف وأين.. لا أعرف.

عدت إلى شقة (توفيق إبراهيم) غريب الأطوار هذا، ما أن رأني حتى هتف:

- باشا، اتفضل.. هاتك تحبك، لدي فراخ مشوية طازة.
أخذت أتساءل منذ متى لم يكن لديه فراخ مشوية، لا بد أن صنبور داره هو مصدرها وإلا فهناك شيء غريب حقا.
- أشكرك على أي حال.

- بقي أنت بقيت الفتوة بتاعها.. طب ما تكلمها يا عم.
قطعت رغيف الخبز الطازج لأطلق سراح الأبخرة المأسورة بداخله منذ خبزه والتي باتت تحلم بالخلاص، فتصاعدت ترقص رقصة الحرية في جو الغرفة.
- لكن هناك مشكلة.

- خير؟
- لم تتذكرني بعد، أشك أنها تحت تأثير شيء ما أفقدها الذاكرة.

ضيق عينيه وقال في ذكاء وهو يقضم فخذ الدجاجة:
- عندي حل مستوحيه من واحد صاحبي.
- الحقني به.
- قلمين على وشها وهاتفتكر اللي جابوك.. إحنا مش فاضيين للدلع ده.

أنا أضرب (ماجبي)، يبدو أن صديقه هذا أخرق.. الحق أن من يفكر في إيذاء ملاك مثل (ماجبي) هو أخرق حقا.

ماذا أفعل..

لا أدري حقاً، إنني يجب أن أسـ...، كم الساعة.. إنه موعد ورديتي في الـ...، أأتم تعرفون، يجب أن أذهب الآن وإلا ذبحني شلاطة.

- سألحق بك حالا.. ثواني بس ألبس الشبشب واجي لك على طول.

- تبا لهذا الشبشب اللعين.

«قليلون هم من يمكننا التضحية من أجلهم»

أنا في وسط الصالة بتكرري الأخرق إياه و(ماجي) مندحجة في وصلة رقص مرتدية بدلة الرقص الكحولية التي تجعلها فاتنة تحاول أن تفعل شيئاً ما ولكنها فاشلة تماماً في هذا، والغريب أن هؤلاء الحمقى مستمتعون تماماً بهذا، بل إن أحدهم اندفع ناحيتها لتحيتها.. يجب أن يوقفه أحد.. ماذا؟ أنا من يجب أن يوقفه فأنا الفتوة هنا.. يا لها من ورطة فهو ضخم كمقطورة لوري ألمانية، عنيف كثور في حلبة مصارعة، اتجهت نحوه وقلت في لهجة تصنعت فيها الحزم:

- على فين يا خفيف؟

أزاح يدي بل وأزاحني كلي بيده كديناصور يهش بعوضة، سقطت أرضاً وقد أمسكت بتلابيبه أثناء سقوطي فاختل توازنه -ساعد على هذا أنه كان ثملاً- هنا تناولت مقعداً وهشمته على رأسه أعرف أن هذا ليس أخلاقياً ولكن ليس هذا وقت الانضمام لجمعية حقوق الإنسان، بعدها صحت بأعلى صوتي في القاعة:

- كل واحد يقعد باحترامه ويعرف إن المعلم (رفعت

اسماعيل) لسه بصحته.

ساد الصمت في القاعة للحظات بعدها.. انفجر الجميع في الضحك الهستيري.. حمقى.. سأريهم ولكن فيما بعد.

أنهت (ماجى) فقرتها وصعد مونولوجست بائس إلى خشبة المسرح ووجدت الجميع يعيرونه اهتماما، إذن فهي فرصتي.

تسللت إلى غرفة (ماجى) وأغلقت الباب فوجلت:

- (عفت) ما الذي جاء بك إلى هنا؟!

- (عفت)؟ عفت مين يا روح خالتك.. إنتي كمان نسييتي اسمي.. أنا (رفعت) يا قطة.

- (عفت).. (رفعت).. (برعى).. مش مهم.. إيه اللي جابك هنا ؟!

- جاي افكرك.. حاولي معايا كده.. أنا (رفعت اسماعيل)..
بحيرة لوخ نس.. القلعة بتاعتك في إنفرنسشاير.. رونييل
السوداء.

خلعت شبشبها في حركة تهديد منذرة بالويل وهتفت:

- إنت اللي ليلتك هاتبقى سودا لو ما غورتش من وشي
دلوقتي.

تبا لكل شبشب العالم.

- باقولك ايه.. استعباط مش عايز.. اتعدلي كده وافتكري
بدل ما أهبدك قلمين يخلوكي تفتكري تاريخك كله.

قرنت القول بالفعل فأنا حقلم أعد أتحمّل كل هذا الملل،
صفعتان فقط.. استنفدت فيهما كل طاقة الفراخ التي أكلتها
على مدار اليومين السابقين.. صفعتان جعلتاني مشرفا على
الذبحة الصدرية، لكنهما قد آتتا ثارهما فقد أفاقت (ماجى)
كمن استيقظ من نوم عميق، يبدو أن صديق (توفيق) هذا

ليس أحقاً تماماً، وهتفت في حرارة:

- (رفعت)!

رقص قلبي في صدري طرباً، لم أعرف من قبل أن اسمي بهذا الجمال.

- (ماجى) الحمد لله أنك بخير.

- ما الذي أتى بي إلى هنا؟ وأين هو (هنا) هذا؟

- أنت -صديقي هذا أو لا- راقصة في ملهى ليلي.

صعقت لهذا طبعاً وصرخت:

- أنا.. راقصة.. كيف؟!

- يبدو أنك تعرضت لشيء جعلك تفقدين الذاكرة، وجعلك تأتين إلى هنا، شيء أصابك بعد وصولك للقاهرة وقبل وصولك للفندق، حاولي تذكر أي شيء.

- لا أذكر شيئاً يا رفعت.. لقد خرجت من المطار واستقللت سيارة أجرة للفندق و... وجدت نفسي هنا.

- يجب أن أعرف لماذا تم اختطافك ولماذا أنت بالذات، خصوصاً أن صاحب المكان شخص أعرفه، ولكني -والحق أقول- لا أرتاح له كثيراً.

- وإلى هذا الحين؟!

- يجب أن تتظاهري أنك مازلت فاقدة للذاكرة، وإلا..

لم أكمل بالطبع، فالمعنى واضح.

- (رفعت).. لم لا نهرب فحسب.

- لأن هناك مخلوقاً يدعى (شلاطة)، أراك فيها بعد.

- رفعت.. للأبد؟

- ماذا؟!

- ستظل تذكرني للأبد؟
- وحتى تحترق النجوم كلها، وحتى تجف الأنهار، وحتى...
- قاطعني طرق على الباب.. الحمد لله، فقد استطعت للمرة الأولى في حياتي أن أقول جملة واحدة بعد احتراق النجوم.
- من بالباب؟
- آآآ.. أنا اسمي (توفيق إبراهيم)، أرجو أن تسمح لي بالدخول يا سيدتي.
- هذا الثعلب اللئيم.. تراه أتى هنا ليلهو! لا أعتقد.. إنه إنسان طيب وشهم برغم كل شيء.
- أشرت لها أن تسمح له بالدخول واختبأت أنا في ركن من المكان.
- دلف (توفيق) وهتف:
- آآآ.. أين د.. (رفعت).
- (رفعت) من؟
- المعلم (رفعت).. الفتوة بتاعك.
- لا أدري.. أكيد بالخارج يضرب أحدهم.
- يضرب.. عود الكبريت هذا يضرب، أرجوك لدي معلومات هامة لكليكما إن كنت قد استعدت ذاكرتك.
- ثواني.
- فتحت الباب للتأكد من عدم وجود فضوليين هنالك، ونادت عليّ حيث كنت ثم قالت له:
- تكلم.
- هل تسمعان عن الفرعون (با - طيخ)* الأول؟
- كلا.

* لا يوجد فرعون بهذا الاسم ولكنها نظرية «دعني أكل بعقلك حلوة» - «انفضل .. أجيّب لك رغيف كمان؟».

- لقد استرعى انتباهي وجود تلك الصورة الفرعونية بكثرة في ملهى ليلي لا يفترض في رواده الثقافة التاريخية أو الوطنية، فبحثت في الشبكة العنكبوتية حتى وجدت صورة ذلك

- الفرعون وقصة غريبة عنه ظننت أنها قد تفسر بعض ما يحدث لهما.

- أكمل .. كلنا آذان صاغية.

- ظهر هذا الفرعون بعد عهد الملك (أحمس) بفترة قصيرة، وقد كان مكروها من الشعب، ففكر له كهنته في تقليد يجعل الشعب يحبه، واستثمرا للانتصار على الهكسوس، وكره الشعب لهم فقد صنعوا له تعويذة سحرية هي (قلادة الخلود)، حيث يرتدي الفرعون هذه القلادة في احتفال ديني مهيب فتهبه الخلود مدى الحياة.

- وما دخل الهكسوس في الأمر؟!

- آه.. ألم أقل لهما بعد.. لتعمل القلادة يجب أن تغمس في دماء حبيبين من الهكسوس وقد امتزجت دماؤهما معا.. حبيبان أحبا بعضهما البعض ما يزيد على عشرة أعوام وما زالا يذوبان حبا.

- يمكنه مزج دماء أي زوجين إذن؟

- يبدو أنك لم تسمع جيدا هذين المقطعين.. أقول (عشرة أعوام - ما زالا يذوبان حبا). أعتقد أن هذا -بالنسبة للأزواج- ضربا من الخيال العلمي.

- هل تقصد أن (لوسيفر) قد وجد قلادة (با - طيخ) الأول ويسعى للخلود على حسابي و(ماجي)؟

- يا لك من عبقرى.. هو ما أقصد.
- لكن (ماجى) من اسكتلندا.. ولم تكن اسكتلندا هي بلد الهكسوس.
- قاطعني صوت البئر المحبب المنفر:
- ربما كانت ذات يوم.. من يدري.. «هل أستراليا هي أستراليا حقا».
- د. (لوسيفر)! كنت أنتظر ظهورك.
- أنا عاتب عليك يا صديقي.. حين تريد العمل في ملهاي عليك أن تقصدي مباشرة ليس ذلك الـ (شلاطة).
- ها نحن وجهها لوجه.. افعل بي ما تريد فأنا ثمرة فاكهة تغضنت وقاربت على الذبول لكن إياك والتعرض لـ (ماجى) تلك الثمرة اليانعة أبدا.
- اطمئن.. لن أتعرض لكما.. فقط أريد بعضا من دمائكما.. وتنصرفان من فوركما.
- وإذا رفضنا.
- ليس هذا ترفا تستطيعانه.
- قالها ونظر إلى عدد من الثيران البشرية ملأوا الغرفة في لحظة.
- كل هؤلاء ينتظرهم الخلود؟
- كلا، فالقلادة تستخدم لشخص واحد فقط، ويجب العثور على حبيين مثلكما لكل واحد منهما، والآن، فلتشمرا عن ساعديكما فقد حان الوقت.

نظرت لـ (ماجي) في عجز فنظرت لي مبتسمة وهمست:

- حتى تحترق النجوم؟

انفجرت فيها:

- الله يحرقك ويحرق النجوم في يوم واحد، هو ذا وقته؟

- رفعت..... حتى تحترق النجوم؟

لمت نفسي على عصيتي معها.. تلك البائسة المسكينة..
زهرة بريّة في مهب العاصفة، لكن من قال إن البستاني
العجوز قادر على مواجهة الريح.

- وحتى تجف الأنهار.. وحتى ينقرض الكنغر.. وحتى...

- ما تخلصونا بقي.

قالها (لوسيفر) في ملل، ففردت ذراعي على آخره
وصرخت:

- هاك ذراعي فلتفعل ما تريد وتتركنا نذهب.

انتهى من مزج دمائها، ولم ينس أن يغطي جرح كل
منا بقطن طبي معقم.. يا له من إنسان مرهف المشاعر،
وضع كوكبيل الدم في إناء ثم غمس فيه القلادة، وأخرجها
وارتداها تقطر دما على عباة السوداء.. وبدا متثشبا بهذا..
كليث جلبت له زوجته غزاة للغداء بينما هو في العرين يتابع
قناة ميلودي.. مخبول.. بعدها هتف:

- من المؤسف أن تموتا حقيا (رفعت)، لكنه شاعري..
أليس كذلك.. روميو وجوليت.. (قيس وليلى).. و(رفعت
وماجي).

- نموت؟! لم تقل لنا هذا.

- يموتان.. لم يذكر الموقع هذا.
- قالها (توفيق) وكنت قد نسيت وجوده أساسا.
- لأنك لم تقلب الصفحة أيها الأحمق.
- أجابه لوسيفر في عدم اكتراث ثم أردف:
- الوداع يا رفعت.
- لي طلب واحد.
- ما هو؟

لم أجب ولكني اندفعت ناحيته أدفعه في صدره، فوجئ بهجومي هذا فاختل توازنه، وسقط أرضا متعثرا في عباءته الطويلة وهو يرغي ويزيد في حين أسرع أحد الثيران يقطع علينا طريق الخروج.. وآخر يضربني على رأسي بشيء ما.. فسقطت أرضا شاعرا بالحنق، وحين رفعت رأسي وجدت (لوسيفر) يكبل حركة (ماجى)، كم أتمنى أن يحترق هذا الشيطان، ولكن لو احترق كل أشرار العالم لتحول العالم إلى فرن بلدي كبير.

- كانت حركة حمقاء منك يا صديقي.
- قلت له في غل حقيقي:
- ما تفعله أنت أكثر حماقة بالتأكد.
- لك أشعر بالشفقة أيها الفاني فأنا بك أس...
- يا عم بلاش الكلمتين الي إنت حافظهم دول «بك أسعد» و«لك قلبي يطرب» خلاص عرفنا، فلقطنا.. دا إيه النيلة دي؟!

- ولكن لماذا لم يمنعنا هؤلاء البلطجية؟
- يبدو أن سرقة القلادة قد شلت تفكيرهم، وقد يكونون تحت تأثير سحر ما مرتبط بالقلادة.
- الآن هيا بنا إلى بيتي لنستريح قليلا ثم تكملين رحلتك في مصر .

- لا لقد اكتفيت بهذه الإثارة حتى الآن، أود السفر فوراً.

- ليكن يا ملاكي.
- ونظرت إلى (توفيق) بامتنان وقلت:
- أنا مدين لك بحياتي.
- ونظرت إلى (ماجي) ثم أردفت:
- وما هو أغلي من حياتي.
- لو أردت أكل فراخ مشوية، فأنا موجود.
- بالطبع يا صديقي.

في المطار وقفت دامعة العينين وهتفت نازرة في عيني:

- حتى تحترق النجوم؟
- وحتى ينقرض الكنغر، وحتى تصل مصر لكأس العالم، وحتى تتد...

«على السادة المسافرين إلى المملكة المتحدة التوجه فوراً لصالة المغادرة».

قاطعني هذا النداء، صافحتها وأعطتني ظهرها وانصرفت، تباهذه الدمعة التي تحاول الفرار، لكنني أصررت على

سجنها في ضلوعي.
فكرت في القلادة التي تحملها، وهل يمكن أن تسبب
العديد من المصائب.
الحقيقة.. نعم.
ولكن هذه قصة أخرى.
د. رفعت اسماعيل

القاهرة

مش فاكرا التاريخ



ملحوظة: نصحني البعض أن أسمى القصة «أسطورة
الشبشب» لأنه كان أكثر نفعا من الفتوة الذي لم يفعل شيئا
في الواقع، لكنني عاندتهم، والآن أشعر أن لديهم حقا.

صدر للكاتب

- حدث في أنتيكا.
- ضربة حب.
- اخبط راسك.
- عزبة البليلة.
- شعب تحت خط النعناع.
- دراع مرسي.
- لقمة الفاضي.
- حمار طروادة.

***يمكنكم التواصل مع الكاتب عبر صفحته الرسمية
على فيسبوك (تامر أحمد Tamer Ahmad).



كيان للنشر والتوزيع

للتواصل معنا :

kayanpub@gmail.com

info@kayanpublishing.com

أو زور موقعنا:

www.kayanpublishing.com

وللاتصال الهاتفي :

هاتف أرضي : 0235688678 - 0235611772

هاتف محمول : 01000405450 / 01001872290

وللاطلاع على كُتُبنا، ومتابعة إصداراتنا الجديدة، وأنشطتنا وأنشطة كُتَّابنا الثقافية
يمكنكم متابعتنا على الروابط التالية :



Kayan.publishing



kayan_publishing



Kayanpublishing



kayanpublishing



+KayanPublishing



KayanPublishing